



22-6512
4432066
=27



Kodak Color Control Patches

蘇州府志卷第八十八

人物志目錄

武功

周

孫武

三國吳

朱桓

朱異

晉

顧眾

父秘

顧承

南北朝

全景文 朱超之

言文達

陸山才

陸子隆 子之武 弟子才

孫瑒 子訓

五代

司馬福

宋

章棨 子緯 綜 綽 綰 縵 孫芟 縵 縵

盧秉

滕膺

周虎

元

金宏業

明

韓雍

陳僕

孔鏞 林昌

陸完

陳天祥

吳寅 曾孫士志

朱純

鄭若曾

皇甫渙

蔣夢龍

陸一鳳 孫崇禮 問禮

周大章 弟大韶

柴秩 從子輔元

何萬鍾

蘇峨山 張二

杜桐 子文煥 孫宏域

張景房

支可大

黃時雨

蕭應宮

陳禹謨

劉錫元

陳必謙 祖交

陳黃道

本朝

何棟 子炯 煜

錢嘉

丁大業 子士偉

蘇州府志卷第八十八

人物

武功

周



孫武吳人吳王闔閭將伐楚伍員乃薦武以兵法見闔閭

曰可試以婦人勒兵乎曰可乃出宮中美人百八十人武分爲二隊以王寵姬二人爲隊長使持戟令曰前則視心左視左手右視右手後則視背婦人口諾乃設鈇鉞三令五申之於是鼓之右婦人大笑武曰約束不明申令不熟將之罪也復令五申而鼓之左婦人復大笑武曰約束申令既明而不
如法者吏士之罪乃令斬二隊長吳王從臺上觀見趣使令

止之武曰臣已受命為將將在軍君命有所不受遂斬二隊長以徇用其次為隊長復鼓之左右前後跪起皆中規矩繩墨無譁武使報王曰兵已整齊唯王所用之雖赴水火可也王曰將軍罷休寡人不願觀王卒用武為將破楚入郢威齊晉以顯於諸侯皆武之力也乾隆吳縣志

三國吳

朱桓字休穆吳人孫權為將軍桓和事幕府除餘姚長往吳痛穀食荒貴桓分部良吏隱親醫藥殮粥相繼士民感遷盪寇校尉使部伍吳會二郡鳩合遺散丹隄桓督領諸將周旋赴討皆平定稍遷裨將軍討吳

代周泰為濡須督黃武元年魏使曹仁將步騎吳

仁欲襲取州上先揚聲欲東吳美谿桓分兵美

仁進軍距濡須七十里間桓乃追還美谿兵兵未到而

至時桓所部兵在者五千人諸將各有懼心桓因偃旗吳

示虛弱以誘致仁仁果遣其子泰攻濡須城分遣將軍常雕

諸葛虔王雙等乘油船別襲中洲中洲者鄒曲妻子所在也

仁自將萬人留橐皋復為泰等吳拒桓部兵將攻取油船或

別擊雕等桓等身自拒泰燒營而退遂梟雕生虜雙送武昌

臨陣斬溺死者千餘權嘉桓功封嘉興侯遷奮武將軍領彭

城相黃龍元年拜前將軍領青州牧假節嘉禾六年魏廬江

主簿呂習請大兵自迎欲開門爲應桓與衛將軍全琮俱以師迎既至事露軍當引還城外有谿水去城一里所諸軍勒兵渡桓自斷後時廬江太守李膺整兵欲須諸軍半渡擊之及見桓節蓋在後卒不敢出其兇憚如此時全琮爲督權又令胡綜叅與軍事綜以軍出無獲議欲部分諸將有所掩襲桓素氣高耻見部伍乃往見綜感激發怒與綜校計綜欲自解因曰上令胡綜爲督綜意以爲宜爾桓愈恚恨使人一綜至軍門桓出迎之顧謂左右曰我縱手汝等各自人旁出語綜使還桓出不見綜知左右所爲因軍進諫刺殺佐軍遂託狂發詣建業治病權惜其

罪使子異攝領部曲令醫護視數月復遣還中丞桓性護前耻爲人下每臨敵交戰節度不得自由輒嗔恚憤激然輕財貴義兼以強識與人一面數十年不忘部曲萬口妻子盡識之愛養吏士瞻護六親俸祿產業皆與共分及抱疾困舉營憂戚年六十二赤烏元年卒史士無不號慕家無餘財權賜鹽五千斛以周喪事子異嗣

吳志

顧承字子直吳人譚弟與舅陸瑁俱以禮徵孫權賜雍書曰貴孫子直令問休休至與相見過於所聞爲君嘉之拜騎都尉領羽林兵後爲吳郡西部都尉與諸葛恪等共平山越別得精兵八千人還屯軍章阮拜昭義中郎使入爲侍中芍陂之

役拜奮威將軍出領京下督數年與兄譚張休等俱徙交州

卒

吳志

朱異字季文吳人以父任爲郎後拜騎都尉代桓領兵赤烏四年隨朱然攻魏樊城建計破其外圍還拜偏將軍魏廬江太守文欽營任六安多設屯砦置諸道要以招誘亡叛爲邊寇害異乃身率其手下二千人掩破欽七屯斬首數百遷揚武將軍權與論攻戰辭對稱意權謂異從父據曰本知季文愴定見之復過所聞建興元年遷鎮南將軍是歲魏遣胡遵諸葛誕等出東興異督水軍攻浮梁壞之魏軍大破太平二年假節爲大都督救壽春圍不解還軍爲孫綝所枉害

吳志

晉

顧衆字長始吳人榮族弟父秘字公真有文武才幹以員外散騎常侍爲交州刺史衆出後伯父早終事伯母以孝聞元帝爲鎮東將軍命爲參軍以討華軼功封東鄉侯辟丞相掾及帝踐阼徵拜駙馬都尉轉尙書郎大將軍王敦請爲從事中郎上補南康太守會詔除鄱陽太守加廣武將軍衆徑之鄱陽不過敦敦甚怪焉及敦構逆令衆出軍衆遲回不發敦大怒以軍期召衆還詰之聲色甚厲衆不爲動敦意漸釋敦事捷欲以衆爲吳興內史衆固辭敦鎮姑孰復以爲從事中郎敦平除太子中庶子爲義興太守加揚威將軍蘇峻反王師

敗績衆還吳潛圖義舉時吳國內史庾冰奔會稽峻以蔡謨代之前陵江將軍張哲爲峻收兵于吳衆遣人喻哲哲從之衆乃遣郎中徐機告謨曰衆已潛合家兵與張哲剋期效節謨乃檄衆爲本國督護揚威將軍吳中人士同時響應大破峻將宏徽收其軍實賊率張健等攻據吳城衆自海虞由婁縣東倉與賊別率戰破之進屯烏苞會稽內史王舒吳興內史虞潭檄衆爲五郡大督護統諸義軍討健潭遣姚休爲衆前鋒與賊戰沒衆還守紫壁時賊黨方銳咸勸衆過浙江衆不聽版范明爲參軍率諸軍復進討健健退曲阿衆進住吳城遣督護朱祈等九軍與蘭陵太守李閔守陵亭健遣馬流

陶陽等攻之閔與祈等逆擊大破之峻平論功封鄱陽縣伯拜丹陽尹本國大中正入爲侍中轉尚書咸康末遷鎮軍將軍揚州大中正固讓未拜以母愛去職穆帝卽位復徵爲領軍不起服闋乃就遷尚書僕射永和二年卒贈特進光祿大夫諡曰靖

晉書

南北朝

全景文字宏達吳郡人少有氣力與沈攸之同載出都到奔牛埭有人相之曰君等皆方伯人行當富貴也景文仍得將領

爲軍主

按南史沈攸之傳云初攸之賤時與吳郡朱超之全景文共乘一小船出都二人共上引埭有人相之曰

三人皆當至方伯後超之廣州刺史齊書少朱超之一人盧志參用之

孝建初爲竟陵王驃騎

行參軍以功封漢水侯泰始二年爲假節寧朔將軍冗從僕射軍主隨劉亮討破東賊於晉陵除長水校尉假輔國將軍北討薛索兒於破釜嶺水軍斷賊糧運仍隨太祖於葛冢石梁再戰皆有功南賊相持未決敕景文隸劉亮拒劉胡攻圍力戰身被十創封孝寧縣侯元徽末出爲南豫州刺史建元元年以不預佐命國除授南琅邪太守遷光祿大夫永明九年卒

南齊書

言文達吳人梁武帝六年隨大將軍獻將兵救鍾離受曹景宗節度文達爲軍士獻命文達實功入城文達潛行水底得以入城中知有外援勇氣百倍

通鑑

陸山才字孔章吳人祖翁寶梁尚書水部郎父汎散騎常侍山才少倜儻好尚文史范陽張纘纘弟綰並欽重之紹泰中都督周文育出鎮南豫州不知書疏以山才爲長史政事悉以委之文育討剋蕭勃禽歐陽頎計畫多出山才後文育重鎮豫章金口山才復爲鎮南長史豫章太守文育爲熊曇朗所害曇朗囚山才等送於王琳去至而侯安都敗琳將常衆愛由是山才獲返累遷散騎常侍西陽武昌二郡太守卒謚簡

南史

陸子隆字興世吳郡人祖敞之梁嘉興令父俊封氏令子隆少慷慨有志功名侯景之亂於鄉里聚徒時張彪爲吳郡太守

引爲將帥隨彪徙鎮會稽及文帝討彪彪將沈泰等皆降而子隆力戰敗績文帝義之復使領其部曲文帝嗣位領甲仗宿衛封益陽縣子累遷廬陵太守周迪據臨州反子隆隨章昭達討迪迪退走因隨昭達討陳寶應晉安平子隆功最遷武州刺史改封朝陽縣伯華皎據湘州反以子隆居其心腹皎深患之頻遣使招子隆不從攻又不克及皎敗於郢州子隆出兵襲其後因與大軍相會進爵爲侯尋遷都督荊州刺史荊州新置治公安城池未固子隆修立城郭綏集夷夏甚得人和號爲稱職吏人詣闕求立碑頌美功績詔許之卒謚威子子之武嗣年十六領其舊軍後爲宏農太守隸吳明徹

於呂梁軍敗逃歸爲人所害子隆弟子才亦有幹畧從子隆征討有功除始平太守封始泉縣子卒於信州刺史

南史

孫瑒字德璉吳人父修道梁中散大夫以雅素知名瑒少倜儻好謀略博涉經史尤便書翰仕梁爲邵陵王中兵參軍事太清之難授假節宣猛將軍軍主王僧辯之討侯景也王琳爲前軍琳與瑒親婭乃表薦爲宜都太守後以軍功封富陽侯敬帝立累遷巴州刺史陳武帝受禪王琳立梁永嘉王蕭莊於郢州徵瑒爲少府卿仍徙都督郢州刺史周遣大將史寧乘虛攻之瑒兵不滿千人乘城拒守周兵不能克及聞大軍敗王琳乘勝而進周兵乃解瑒於是盡有中流之地遣使奉

表歸陳天嘉元年授湘州刺史封定襄縣侯瑒懷不自安乃
 固請入朝徵為散騎常侍中領軍未拜文帝謂曰昔朱買臣
 願為本郡卿豈有意乎改授吳郡太守給鼓吹一部秩滿徵
 拜散騎常侍中護軍及留異反東陽詔瑒督舟師進討異平
 遷鎮右將軍出為建安太守大建四年為都督荊州刺史出
 鎮公安瑒增修城池為鄰境所憚居職六年以公事免及吳
 明徹軍敗呂梁初授都督緣江小陸諸軍事尋授都督郢州
 刺史十二年坐瑒場交通抵罪後主嗣位復爵邑歷度支尙
 書侍中祠部尙書後主頰幸其宅賦詩述勲德之美遷五兵
 尙書領左軍將軍禎明元年卒官謚曰桓瑒事親以孝聞於

諸弟甚篤睦性通泰財物散之親友居處頗失於侈又巧思

過人為起部尙書中國器械多所創立瑒二十一子第二子

訓頗知名位高唐

守南史參陳書

五代

司馬福吳郡人始隸吳越王水軍為游奕都虞候開平三年淮
 人圍姑蘇置柵環城內外阻絕王遣救兵至莫知城中音問
 福能水中行總帥因遣入城淮人設網懸銅鈴織鱗過之必
 覺福以巨竹觸網淮人聞鈴聲舉網網舉而得度或浮水上
 則戴萍苳而行因得入城既而復出凡在水中三日及救兵
 與城中弓矢相應淮人以為神軍中皆服福奇才進官都指

揮使吳越王城吳江置軍鎮命福王之遂老於職

吳越備史

宋

章棻字質夫浦城人祖頴爲侍御史忤章獻后旨黜官仁宗欲用之而卒父訪禮賓副使旣徙蘇號曰北章棻以叔得象蔭爲孟州司戶參軍應舉入京聞父對獄于魏棄不就試馳往直其寃還試禮部第一擢知陳留縣歷提舉陝西常平京東轉運判官提點湖北刑獄成都路轉運使入爲考功吏部右司員外郎元祐初以直龍圖閣知慶州時朝廷戢兵戒邊吏勿妄動且捐葭蘆安疆等四砦予夏使歸永樂之人棻言夏嗜利畏威不有懲艾邊不得休息宜稍取其疆土如古削地

之制以固吾圉然後諸路出兵擇據要害不過一再舉勢將自感矣遂乘便出討以致其師夏果入圍環州棻先用間知之遣驍將折可適伏兵洪德城夏師過伏兵識其母梁氏旗幟鼓譟而出斬獲甚衆又預毒牛圈潄水夏人馬飲者多死除知同州紹聖初知應天府加集賢殿修撰知廣州徙江淮發運使哲宗訪以邊事對合旨命知渭州至卽上言城胡蘆河川據形勝以逼夏乃以三月帥熙河秦鳳環慶四路之師出胡蘆川河築二城於石門峽江口好水河之陰二旬有二日成賜名平夏城靈平砦方興役時夏以其衆來乘棻迎擊敗之旣而環慶鄜延河東熙河皆相繼築城進拓其境夏人

嘗知河南府純祐官

止將作監簿此恐誤一見待以國士與韓玉汝李邦直等俱

以文行薦於朝就除京兆府教授政和末起知解州移均州房州婦人越所部訴其子於均綜謝曰房非吾治也又訴於轉運使使以屬綜召詣庭下不以屬吏鑄論開曉母子感悔再拜而去歷陝西轉運判官入爲戶部員外郎中書侍郎劉逵妻綜之姊也逵漸復元祐之政綜多贊之蔡京欲擠逵且忌綜不附已使其黨攻之出綜湖州論者不已差主管西京崇福宮坐縱獄竄温州入爲秘書省校書郎遷倉部員外郎宣和三年除提舉兩浙常平未上改提點刑獄時秀州嘉興富人高安與陳氏有故怨聞方臘起誣以爲盜聚羣惡操兵入其室盡殪之以捕盜徼賞及長洲陸氏怙富橫閭里殺人應捕輒昧吏執平人代已綜一閱盡得其情取二人寘諸法衆懼以爲神明四年以直秘閣知越州兼浙東安撫越新去方臘之亂人情危懼曰三四驚旁郡守將往往益兵自衛綜至延問吏民宴集僚佐如平時有勇敢卒謀爲變綜飭將吏指取無一人脫者闔郡大震譚稹宣撫燕山請綜爲參謀轉朝請大夫右文殿修撰遂疏燕雲決不可守之狀反復數干言金人破蔚州背歸山後議稹以錯置乖方罷綜落職送吏部及童貫出師而燕山七郡與朔武皆不守如綜言會赦恩上書告老復龍圖閣直學士致仕卒綜歷通判常州館知丹

徒縣縉字君遠簽判西安州縉字彥升簽判蘇州袁孫菱承
 奉郎蓋監蘇州稅俱列仕顯及蔡京復相遂與制獄傾章氏
 縉居蘇州或得私鑄錢數巨罌京風言者誣縉與州人郁寶
 所鑄詔遣李孝壽張茂直沈畸蕭服更往鞫之連繫數百人
 累月卒無實獄多死者京大怒別遣孫傑鞫之傳致如律縉
 刺面配沙門島追毀出身以來文字除名勒停籍入其家竄
 絳台州綜秀州綜温州綜睦州縉永州菱處州蓋均州官司
 降罷除名者十餘人時論寃之孫傑擢龍圖閣直學士知蘇
 州張商英為相辨前獄移縉當州綜復朝奉郎通判秀州頃
 之縉改授內殿崇班綜秘書郎

以上參用盧志 按孫覲章
 綜墓志中吳紀聞皆云章氏

本建安郇公之後裔後徙於平江者有二族子厚丞相家州
 南質夫樞密家州北兩地屹然輪奐相望為一州之甲吳人
 號南北章以別之則章氏之徙吳鑿鑿可據乃東
 都事略及宋史但言浦城人蓋舊史之疏脫多矣

盧秉字仲甫父革德清人以光祿卿退居於吳秉未冠有雋譽
 嘗謁蔣堂坐池亭堂曰亭沼粗適恨林木未就耳秉曰亭沼
 如爵位時來或有之林木非培植根株弗大成似士大夫立
 名節也堂賞味其言曰吾子必為佳器中進士甲科調吉州
 推官青州掌書記知開封府倉曹參軍浮湛州縣二十年人
 無知者王安石得其壁間詩識其靜退方置條例司預選中
 奉使淮浙治鹽法與薛向究索利病出本錢鬻鹽濱海之民
 戒不得私鬻還奏遂為定制檢正吏房公事提點兩浙淮東

刑獄專提舉鹽事持法苛嚴罪及妻孥一歲中犯者以千萬數進制置發運副使東南饑詔損上供米價以糶秉言價雖賤貧者終艱得錢請但償糶本而以其餘振贍是歲上計神宗問曰聞滁和民捕蝗充食有諸對曰有之民飢甚死者相枕藉帝惻然曰前此特趙抃爲朕言之爾先是發運使多獻餘羨秉言職在董督六路財賦以時上之安得羨請自是罷獻獨以七十萬緡償三司逋加集賢殿修撰知渭州五路大出西討惟涇原有功進寶文閣待制夏境胡盧州距塞二百里恃險遠不設備秉遣將姚麟彭孫襲擊之俘斬萬計遷龍圖閣直學士夏酋仁多嵬丁舉國入寇犯熙河定西城秉治

兵瓦亭分兩將駐靜邊砦指夏人來路曰吾遲明坐待捷報矣及明宋至見宋師驚曰天降也縱擊之皆奔潰嵬丁死詔褒賜服馬金幣秉守邊久表父革年老乞歸知湖州行二驛復詔還渭革疾亟乃得歸元祐中知荆南劉安世論其行鹽法虐民降待制提舉洞霄宮卒

宋史子知法法原別有傳

滕膺字子勤吳縣人茂實從子紹聖進士授台州戶曹方臘作亂台州震恐知府趙咨道通判李景淵駭愕遁去膺慨然任其責移書訣父母昆弟肩妻子於署解諭台民以利害人人感泣聽命下令發夫守險增陴浚隍治器募兵運糧糗分屯列柵爲死守計日夜撫循士卒城中始有固志山民呂師囊

起兵應賊導以攻城前後數匝膺應機設伏立摧破之城賴以全存活甚衆時咨道景淵雖遁而膺所上下公牒仍係其爵名圍解亟歸上狀膺不預又闔尹擅兵賊臣柄國咨道景淵獵顯官膺僅從捕盜七人之例改京秩未幾徙衢州司錄及金人犯順起爲提舉攝應天府少尹高宗以元帥駐河北勸進爲帳前準備差俄改淮寧通判拒劇盜孔彥舟王善數十萬衆以守城功移知蔡州除直秘閣京西路計度轉運副使渡江爲張俊參軍李成所嫉劾免後復起至管台州崇道觀十五年卒諡忠惠台人德之立廟祀請於朝賜額義靈寧

宗初贈忠烈侯

牛若麟吳縣志本朱文公集

周虎字叔子臨淮人靖康中徙居常熟爲人倜儻輕財尙氣慶元二年武舉進士第一授殿司步軍同正將除武學諭閣門舍人充金國賀生辰接伴副使知光楚二州開禧二年知和州時金兵入寇圍和州甚急虎部分將士乘城拒守其母何氏擁孫息期與兒偕存亡虎謂父老曰吾國家守臣一朝去此則爲奔亡之人失節敗名生不如死效死弗去雖歿猶生吾計決矣合戰凡三十四殺驍將十數最後射死其右帥石砣礮虜大劄引去于是和議堅決江淮奠枕矣虎推功歸母進封永國太夫人故賞不及虎州人德之生爲母子立祠特轉武功大夫正任文州刺史移廬州辭不就除主管侍衛馬

軍行司公事特授成州團練使侍衛馬軍都虞候帶御器械兼幹辦皇城勾間提舉佑神觀言者指為權黨坐謫徽州得旨自便復元官未幾母死誓不出仕歸吳杜門託臂除知和州特轉行一官者再辭表至八九上得請乃已家居十二年雖舊所部候之人堅不與接紹定二年轉和州防禦使卒年六十九謚忠惠廟號忠烈虎有大將器功在江淮忠節罕比而文詞瞻敏尤善大字名重一時

盧志

按宋史開禧二年十一月戊戌金人圍和州

守將周虎拒之至十二月癸丑金人去和州虎全城之功可信然謂和議由此堅決則未然也

元

金宏業字修可吳縣人居濱太湖羣盜出沒宏業結民兵保障

鄉社方國珍亂其黨剽掠吳中宏業遣孫榮一榮三拒之皆力戰死越月寇又至宏業逐之于黃洋灣殺獲無算一境無恙江浙行省上其功授義兵千戶

江南通志

明

韓雍字永熙長洲人正統七年進士授御史負氣果敢以才畧稱錄囚南畿碭山教諭某笞膳夫膳夫逃匿父訴教諭殺其子取他兒支解以證既誣服雍蹤跡得之白其寃出巡河道已巡按江西黜貪墨吏五十七人廬陵太和盜起捕誅之十三年冬處州賊葉宗留自福建轉犯江西官軍不利都督僉事陳榮指揮劉鎮遇伏死詔雍及鎮守侍郎楊寧督軍民協

守會福建巡按御史汪澄牒鄰境會討賊鄧茂七俄以賊議降止兵雍曰賊果降退未晚也趨進賊已叛澄坐得罪死人以是服雍識景泰二年擢廣東副使大學士陳循薦爲右僉都御史代楊寧巡撫江西歲饑奏免秋糧劾奏寧藩不法事王府官皆得罪時雍年甫三十赫然有才望所規畫措置咸可爲後法天順初罷天下巡撫官改山西副使寧藩以前憾劾其擅乘肩輿諸事下獄奪官起大理少卿尋復爲右僉都御史母憂起復巡撫宣府大同議事入覲帝壯其貌留爲兵部右侍郎憲宗立坐學士錢溥累貶浙江左參政廣西猺獞流剽廣東殘破郡邑殆遍成化元年正月大發兵拜都督趙

輔爲總兵官以太監盧永陳瑄監其軍兵部尙書王竑曰韓雍才氣無雙平賊非雍莫可乃改雍左僉都御史贊理軍務雍馳至南京集諸將議方畧先是編修邱濬上書大學士李賢言賊在廣東者宜驅在廣西者宜困欲宿兵大藤峽扼其出入蹂其禾稼期一二年盡賊賢善之獻於朝詔錄示諸將諸將主其說請令遊擊將軍和勇率番騎趨廣東而大軍直趨廣西分兵撲滅雍曰賊已蔓延數千里而所至與戰是自敝也當全師直搗大藤峽南可援高肇雷廉東可應南韶西可取柳慶北可斷陽峒諸路首尾相應攻其腹心巢穴旣傾餘迎刃解耳舍此不圖而分兵四出賊益奔突郡邑益殘所

謂救火而噓之也衆曰善輔亦知雍才足辦賊軍謀一聽雍
雍等遂倍道趨全州陽峒苗掠興安擊破之至桂林斬失機
指揮李英等四人以徇按地圖與諸將議曰賊以修仁荔浦
爲羽翼當先收二縣以孤賊勢乃督兵十六萬人分五道先
破修仁賊窮追至力山禽千二百餘人斬首七千三百級荔
浦亦定十月至潯州延問父老皆曰峽天險不可攻宜以計
困雍曰峽延廣六百餘里安能使困兵分則力弱師老則財
匱賊何時得平吾計決矣遂長驅至峽口儒生里老數千人
伏道左願爲嚮導雍見卽罵曰賊敢給我叱左右縛斬之左
右皆愕旣縛而袂中利刃出推問果賊也悉支解刳腸胄分

桂林箐中纍纍相屬賊大驚曰韓公天神也雍令總兵官歐
信等爲五哨自象州武宣攻其北身與輔督都指揮白全等
爲八哨自桂平平南攻其南參將孫震等爲二哨從水路入
而別分兵守諸隘口賊魁侯大狗等大懼先移其累重於桂
州橫石塘而立柵南山多置滾木礮石鏢鎗藥弩拒官軍十
二月朔雍等督諸軍水陸並進擁團牌登山殊死戰連破石
門林峒沙田右營諸巢焚其室廬積聚賊皆奔潰伐木開道
直抵橫石塘及九層樓諸山賊復立柵數重憑高以拒官軍
誘賊發矢石度且盡雍躬督諸軍緣木攀藤上別遣壯士從
間道先登據山頂舉礮賊不能支遂大敗先後破賊三百二

十四砦生擒大狗及其黨七百八十人斬首三千二百有奇
墜溺死者不可勝紀峽有大藤如虹橫亘兩崖間雍斧斷之
改名斷藤峽勒石紀功而還分兵擊餘黨鬱林陽江洛容博
白次第皆定帝大喜賜敕嘉勞召輔等還遷雍左副都御史
提督兩廣軍務雍乃散遣諸軍以省饋餉而遺孽侯鄭昂等
遂乘虛陷潯州及洛容北流二縣雍發兵撲討應時破殄尋
以憂歸明年兩廣盜復起起復雍右都御史總督如故雍抵
任遣參將張壽遊擊馮昇等分道討賊皆摧破之蠻民素懼
雍威寇盜浸息九年柳潯諸蠻復叛參將楊廣等俘斬九百
人方更進而賊破懷集縣兵部劾雍奏報不實廣西鎮守中

官黃沁素憾雍抑已因訐雍且言其貪欲縱酒濫賞妄費帝
遣給事中張謙等往勘而廣西布政使何宜副使張敷銜雍
素輕已共醞釀其罪竟命致仕去雍洞達闔爽重信義撫江
西時請追諡文天祥謝枋得有雄畧善斷動中事機臨戰率
躬親矢石不目瞬自奉尊嚴三司皆長跪白事軍門設銅鼓
數十儀節詳密裨將以下繩桺無所假兩地鎮守宦官素驕
恣亦惕息無敢肆疾惡嚴坦中不爲崖岸揮斥財帛不少惜
故雖令行禁止民得安堵而謗議亦易起爲中官所齟齬公
論皆不平兩廣人念雍功尤惜其去爲立祠祀焉家居五年
卒年五十七正德間諡襄毅

明史

陳僎字汝翼吳縣人鎡從子景泰二年進士除南京御史有墜馬死者執一人掠服之僎察其有寃色廉得死者故與有怨其家緣此中傷之閹屍果得墜死狀卽日出之行殿火民盜一木有司當以盜內府物斬僎曰行殿非禁中比况煨燼之餘乎竟以戕死論嘗巡鹽一商人從他人得其家書轉致之僎曰吾家書顧令汝輩持來邪焚而答之奸人歛手不敢犯出爲四州僉事天順五年敘州九箐山都長土獠聚衆肆掠朝命都督同知許貴統卒五萬討之僎前驅入破其寨四十餘賊平建議增設內江等二十二縣丞簿飭吏治修戰備更置關堡以規久遠請免宜賓南溪江安納溪民兵戍松潘者

以戍長寧罷建昌鹽井之餽運使得專戰守事下所司不盡行明年夾江花溪盜乘間起擾漢州德陽巡撫陳泰檄僎討平之功未報會敘南猶弗靖巡撫汪浩復強僎往會貴帥議軍事及還舟覆溺死敘州江中年四十五朝野痛悼

徐有貞誌

孔鏞字韶文長洲人友諒子景泰五年進士知都昌縣分戶九

等以定役設倉水次便收斂民甚賴之以弟銘尙寧府郡主改知連山猺獞出沒鄰境縣民悉竄鏞往招之民驚走鏞炊飯民舍留錢償其直以去民乃漸知親鏞相率還鏞慰勞振恤俾復故業教以戰守道路漸通縣治遂復都御史葉盛征廣西以鏞從諸將妄殺者鏞輒力爭所全活甚衆成化元年

用葉盛等薦擢高州試知府前知府劉海以猺警閉城門自護鄉民避猺至者輒不納還爲猺所戕又疑民陰附賊輒戮之賊緣是激衆怒爲內應城遂陷鏞至開門納來者流亡日歸城不能容別築城東北居之附郭多暴骸民以疫死復爲公長屯茅峒屢招不就鏞一日單騎從二人直抵茅峒去城十里許道遇賊徒令還告曰我新太守也公長驟聞新守至亟呼其黨擐甲迎及見鏞坦易無驕從氣大沮鏞徐下馬入坐庭中公長率其徒弛甲羅拜鏞諭曰汝曹故良民迫凍餒耳前守欲兵汝吾今奉命爲汝父母汝我子也信我則送

我歸資汝粟帛不信則殺我卽大軍至無遺種矣公長猶豫其黨皆感悟泣下鏞曰餒矣當食我公長爲跪上酒饌旣食曰日且暮當止宿夜解衣酣寢賊相顧駭服再宿而返公長遣數十騎擁還城中人望見皆大驚謂知府被執來給降也盡登陴鏞止騎城外獨與羸卒入取穀帛使載歸公長益感激遂焚其巢率黨數千人來降公長旣降諸賊次第納款惟曉恃險不服鏞選壯士二百人乘夜抵化州曉倉皇走匿獲其妻子以歸撫恤甚厚曉亦以五百人降已與僉事陶魯敗賊廖婆保他賊先後來犯多敗去境內大定上官交薦擢按察副使分巡高雷二府益招劇賊梁定侯大六鄧辛酉等給

田產分處內地爲官備他盜廣西賊犯信宜岑溪皆擊敗之
治績聞賜誥命旌異遭喪服除改廣西猺獞聞鏞至悉遠遁
四十四年兵部上其功資銀幣尋進按察使遷左布政使旋
以右副都御史巡撫貴州清平部苗阿溪者桀驁多智其養
子阿賴尤有力橫行諸部中守臣皆納溪賂驕不可制鏞行
部至清平詢得溪所昵者二人遂以計擒溪磔之并討平雞
背苗羣蠻震懾鏞居官廉歷任三十餘年皆在邊陲觸瘴成
疾乞骸骨不許宏治二年召爲工部右侍郎道卒年六十三
初鏞幼孤貧甚有林昌者識之妻以女弟昌宋寓公槩之後
授徒爲業有醇德後以子符貴封御史以上壽終嘗自草墓

志明史參王
志堅稿

陸完字全卿長洲人成化二十三年進士爲御史有聲正德初
歷江西按察使寧藩宸濠雅重之時召預曲宴以金罍爲贈
擢僉都御史拜兵部侍郎霸州賊劉六劉七等起奉楊虎爲
首惠安伯張偉右都御史馬中錫師出無功詔完兼右僉都
御史提督軍務統京營宣府延綏軍討之副總兵許泰游擊
郤永等敗楊虎等於霸州指揮賀永等再敗賊信安副總兵
馮楨復大敗之阜城賊解而南陷山東縣二十楊虎兵北殘
威縣新河完請濟師益發遼東山西諸鎮兵逐賊賊南圍濟
寧轉寇曹州楨泰永擊斬二千餘人獲其魁朱諒錄功進右

都御史中官谷大用張忠意賊旦暮平乃自請督師詔以大用總督軍務伏羌伯毛銳充總兵官忠監神鎗統京軍五千人會完討賊時劉六等縱橫沂莒間而陽虎陷宿遷靈璧及歸德州縣邊兵追賊至小黃河渡口百戶夏時設伏感之虎溺死餘賊奔河南推劉惠爲首大敗副總兵白玉軍攻陷沈邱鹿邑有陳翰者與甯龍謀奉惠爲奉天征討大元帥趙鏐副之翰自爲元帥府長史與龍立東西二廠治事分其軍爲二十八營以應列宿營各置都督聚衆至十三萬欲牽制官軍於是惠鏐擾河南劉六及齊彥名等擾山東黨分爲二已而六復轉而北還趨霸州帝急召完赴援完擊破之文安賊南至湯陰完又督諸將追敗之明年正月六等復突霸州京師戒嚴廷議召大用銳還別命都御史彭澤同咸寧伯仇鉞辦河南賊以畿輔山東賊委完完遣永追敗劉六於宋家莊賊南犯滕縣副總兵劉暉大敗之賊遂奔登萊海套完師次平度檄永玉與遊擊溫恭三道進攻皆大敗之會河南賊已平劉六等勢益衰遂走湖廣至漢口爲指揮滿弼等追及劉六中流矢赴水死劉七齊彥名率五百人舟行自黃州順流抵鎮江南京告急完疾趨而南帝命彭澤仇鉞會完軍進勦賊抵通州颶風大作棄舟走保狼山完夜導軍登山感之彥名中槍死七中矢亦赴水死餘賊盡平還朝進完太子少保

左都御史廕子錦衣世百戶明年代何鑑爲兵部尙書完有才智急功名善交權勢劉暉許泰江彬皆其部將後並寵倖用事完遂得其力時宸濠已萌異志聞完爲兵部致書盛陳舊好欲復護衛及屯田完答書令以祖制爲辭宸濠遂遣人輦金帛鉅萬徧遺用事貴人屬錢寧爲內主比奏下完遂爲覆請上並與之舉朝譁然十年改吏部尙書宸濠反就執中官張永至南昌搜其籍得完平日交通事上之帝大怒執完收其母妻子女將寘極刑值武宗崩世宗立廷臣覆讞以平賊功在八議之列得減死戍福建靖海衛明史

陳天祥字元吉吳江人其先隸籍武功衛宏治九年進士授青

州府推官入爲御史遷西安知府歷山東副使整飭天津時流賊劉六等聚衆轉劫天祥嚴號令守要害獲渠魁及其黨七十餘人以功加太僕少卿時朝命都督張俊率精銳援天津天祥與夾攻俘斬甚衆進左僉都御史賊平徵還巡撫貴州洞苗亂天祥發漢土兵攻破諸寨禽斬六千餘級捷聞賜金幣宣大有警命總督軍務寇遁進左副都御史改督陝西三邊尋奉命理閩浙鹽道過吳江卒於家天祥警敏有才畧臨事能斷所至有聲在天津功尤著

松陵文獻

吳寅字敬夫常熟人宏治乙卯舉人授武昌同知巨盜劉七殘河汴官捕之急入於鄂民皆逃迸寅調戰守具民以無恐巨

盜趙璠變形服匿境內寅設計擒之械至於京再遷河東都轉運使同知凡爲鹺使多損譽寅涖職謹名特起御史與寅不咸加擢劾寅亦奏辨竟解職還單車上道至無以爲行鄧志曾孫士志字伯高父歿哀慟常絕而復蘇踰小祥目失明耳失聰口失音血枯骨立見者以爲人腊免喪未幾卒舊志

朱紘字子純長洲人正德十六年進士除景州知州調開州嘉靖初遷南京刑部員外郎歷四川副使與副總兵何卿共平深溝諸砦番五遷至廣東左布政使二十五年擢右副都御史巡撫南贛明年七月倭寇起改提督浙閩海防軍務巡撫浙江初明祖定制片板不許入海承平久奸民闌出入勾倭

人及佛郎機諸國入互市閩人李光頭歙人許棟踞寧波之雙嶼爲之主司其質契勢家護持之漳泉爲多或與通婚姻假濟渡爲名造雙桅大船運載違禁物將吏不敢詰也或負其直棟等卽誘之攻剽負直者脅將吏捕逐之泄師期令去期他日償他日至負如初倭太怨恨益與棟等合而浙閩海防久隳戰船哨船十存一二倭剽掠輒得志益無所忌來者接踵紘巡海道採僉事項高及士民言謂不革渡船則海道不可清不嚴保甲則海防不可復上疏具列其狀于是革渡船嚴保甲搜捕奸民間人資衣食於海驟失重利雖士大夫家亦不便也欲沮壞之紘討平覆鼎山賊明年將進攻雙嶼

使副使柯喬都指揮黎秀分駐漳泉福寧邊賊奔逸使都司盧鏗將福清兵由海門進而日本貢使周良違舊約以六百人先期至紈奉詔便宜處分度不可却乃要良自請後不爲例錄其船延良入寧波賓館奸民投書激變紈防範密計不得行夏四月鏗遇賊於九山洋俘日本國人稽天許棟亦被禽棟黨汪直等收餘衆遁鏗築塞雙嶼而還番舶後至者不得入分泊南麂礁門青山下入諸島勢家旣失利則宣言被禽者皆良民非賊黨用搖惑人心又挾制有司以脅從被擄予輕比重者引強盜拒捕律紈上疏曰今海禁分明不知何由被擄何由脅從若以入番導寇爲強盜海洋敵對爲拒捕

臣之愚暗竇所未解遂以便宜行戮紈執法旣堅勢家皆懼貢使周良安挿已定閩人林懋和爲主客司宣言宜發回其使紈以中國制馭諸番宜守大信疏爭之強且曰去外國盜易去中國盜難去中國瀕海之盜猶易去中國衣冠之盜更難閩浙人益恨之竟勒周良還泊海嶼以俟貢期吏部用御史閩人周亮及給事中葉鏗言奏改紈巡視以殺其權紈憤明年春上疏言臣整頓海防稍有次第亮欲侵削臣權致屬吏不肯用命旣又陳明國是正憲體是紀綱扼要害除禍本重決斷六事語多憤激中朝士大夫先入浙閩人言亦有不悅紈者矣紈前討溫盤南麂諸賊連戰三月大破之還平處

州礦盜其年三月佛郎機國人行劫至詔安紘擊禽其渠李
光頭等九十六人復以便宜戮之具狀問語復侵諸勢家御
史陳九德遂劾紘擅殺落紘職命兵科都給事杜汝禎按問
紘聞之慷慨流涕曰吾貧且病又負氣不任對簿縱天子不
欲死我聞浙人必殺我吾死自決之不須人也製壙志作絕
命詞仰藥死紘清強峭直勇於任事欲爲國家杜亂源乃爲
勢家構陷朝野太息自紘死罷巡視大臣不設中外搖手不
敢言海禁事撤備弛禁未幾海寇大作毒東南者十餘年明史
鄭若曾字伯魯崑山人文康五世孫幼有經世志凡天文地理
山經海籍靡不周覽嘉靖中以諸生入北雍闈中擬元者再

竟不遇就選亦未仕倭擾東南總制胡宗憲摠兵戚繼光延
若曾入幕中叅贊機務後以叙功論授錦衣職力辭弗受所
著有江南經畧籌海圖編及八閩志日本圖纂等書縣志

皇甫渙字時亨吳江人嘉靖丁未進士除南昌知縣內艱服闋
補固安皆著能聲轉形部主事進員外郎出爲廣東僉事備
兵嶺西苗民張璉嘯亂渙討平之擢參議駐惠潮賊林朝曦
復圍程鄉開門納郊外民夜出師爲奇兵賊疑援至遁匿陰
那大山山險莫可搜坐困之生獲朝曦而還功上奸黨持之
僅加一級卒坐劾歸里亡何起參政先疽發卒所著有蓮塘

漫筆

董爾基續
吳江志

蔣夢龍字子徵長洲人嘉靖乙丑進士累官湖廣參議討大圍

山賊擒其渠魁餘黨讐服復請置戍山麓以絕禍本

江南通志

陸一鳳字子韶常熟人潤曾孫嘉靖壬子舉人授泉州府同知

泉故瀕海歲被倭寇一鳳簡勁卒為水寨戍之以艤艦翼其

外既而他海舟皆以颶敗而一鳳所部獨全尋偕諸將討海

寇林鳳大破之覆其巢詔賜白金一鎰凡三署府篆四攝縣

事所至清戎籍理屯政課鹽法俱能舉職以勞瘁卒于官所

著有三禮奧義孫崇禮萬厯戊戌進士平陽知縣問禮萬厯

甲辰進士南贛巡撫

管錢二志合纂

周大章字一夔吳江人邑人多好經術而大章獨明兵法嘉靖

三十一年舉於鄉明年三月倭猝犯青陽港知縣楊芷請為

叅謀部署子弟以飛艦斷其上流斬首十八級生擒五人吳

人始有戰志三十三年六月倭自崑山掠閫門南下大章以

輕舟邀之斬首十六級明年正月復禦之平望斬首十一級

當事偉其功先後賚以銀幣不受巡撫周琬檄守朱涇踰年

乃罷論功當授官大章以養親辭乃官其子崇仁蘇州衛千

戶世襲後大章為餘姚教諭會瑞安被倭患吏部遂以大章

知瑞安縣縣城庫陋乃鳩眾築城九里門皆有樓周以雉堞

倭不敢逼卒於官有文藝集及禦寇賦畧弟大韶嘗從大章

叅謀幕府立功海上尤精水利之學萬厯五年巡按御史林

應訓議開東南水利引大韶與共事所著有水利節畧兵家

緒言

松陵文獻

柴秩字虞敘崑山人奇季子十歲通春秋二十八太學時島夷
通市者剽掠歲見秩策其必內訌與姪輔元謀講求戰守之
具訓練丁壯多蓄弓弩油蠟之屬人或笑之甲寅四月倭寇
猝至縣令祝乾壽募民城守素知秩才令守牛橋灣乃攻圍
最急要衝也秩與輔元率合族家丁三百人禦之輔元字子
貞能左右射善矛槊尤長大刀城守四十六日矢無虛發遙
見火光連弩射之斃其四酋羣倭昇酋長牛角大王至城下
一箭貫其顛有乘夜梯城者投三百斤石殺之秩又募壯士

夜往新洋江燒賊船六十餘艘倭始懼不敢犯東城尋解圍
去秩與輔元絕不言功惟祝令深加歎服方城守時民駭走
多枵腹秩出粟炊熟截竹為器盛貯道旁以濟其飢全活甚
眾就選授浙江布政司都事攝臨安築築堤以防海水陞寧
州判官署本州事廉明甚著念母夏年老遂請終養歸母卒
哀毀骨立人稱至孝所著有西湖吏隱稿怡顏堂雜集

縣志

何萬鍾字世錄其先景陵人世襲蘇州衛指揮使萬鍾中武會
試掌衛事振刷戎政為巡撫海瑞所稱曰武臣不朘削以媚
有司僅見何萬鍾一人而已用薦補漳汀把總以擒獲盜魁
賜金幣萬歷初進都司倭犯海上兵未集萬鍾選千人分十

營夜則多舉炬火以疑之倭遂遁調守興都大學士張居正還鄉文武將吏奔走俯伏萬鍾不介胄獨以冠服見居正不懌當事懼遂令解任歸俄得疾卒年僅五十

劉鳳志

蘇峨山蘇州人爲人有膽畧好口才負官逋遁於嘉興項公子家公子故與胡總制宗憲善薦於胡胡方欲說降徐海使蘇至賊巢申約賊遂歸降胡所賜賚及賂贈與敘功賞賜凡得二三萬金後歸老閩門外洞涇橋時有張二莫知所自出善伏水中能月餘不食又躡捷善走嘉靖甲寅倭變應募太守令調賊數挾利器泗水遇賊舟鑿其底沉之又時入賊巢偵其情斬首以獻大守犒之銀牌不受犒之以酒賊平論功應

襲百戶郡縣加以章服卻不受

吳門補乘

杜桐字來儀崑山人徙延安衛萬厯初由世廕累官清水營守備以謀勇著遷延綏入衛遊擊將軍改古北口參將用總督梁夢龍薦擢延綏副總兵十四年就拜署都督僉事充總兵官時卜失免以都督同知爲套中主威令不行其下各雄長志常叵測朔漠素無痘症自嘉靖庚戌深入石州染此症犯者輒死打兒漢者卜失免祖吉能部落也數將命奉貢累官指揮同知一日互市還與其儕禿退台吉等俱染痘死禿退子阿計疑邊吏醜其父思亂及卜失免西助火落赤共擾河西諸部遂蠢動十九年冬打兒漢子土味與他部明安互市

訖復臨邊要賞聲犯內地桐與巡撫賈仁元計先出兵襲之乃令參將張剛自神木遊擊李紹祖自孤山桐率輕騎自榆林三道竝出遇寇力戰大破之斬首四百七十餘級馘明安而還延綏自吉能納款塞上息肩二十年自此兵端復開明安子擺言太日思報復寇鈔無已時矣桐先被劾罷以是役功超授右都督僉書後府二十一年以總兵官鎮保定二十四年徙延綏明年再徙鎮寧夏著力免宰僧入犯逆戰水塘溝俘斬百二十寇益糾諸部連犯平虜興武桐督諸將馬孔英鄧鳳蕭如蕙等連破之斬首二百餘級而延綏將士亦數搗巢諸部長懼乞款詞甚哀三十年二鎮撫臣孫維城黃嘉

善協謀撫之乃復貢市論功文臣自內閣以下悉進官桐以先去職但賚銀幣許復用而已久之卒於家桐自偏裨至大帥積首功一千八百時服其勇弟松別有傳子文煥字啟武由廕敘歷延綏遊擊將軍累進叅將副總兵四十三年擢署都督僉事寧夏總兵官延綏被寇文煥赴救大破之明年遂代官秉忠鎮延綏屢敗寇安邊保寧長樂斬首三百有奇西路火落赤卜言大懼相率降沙許數盜邊爲文煥所敗遂納款旣而復與吉能明愛合駐高家柏林邊要封王補賞十事文煥襲其營斬首百五十火落赤諸部落攢刀立誓獻罰九九九九者部落中罰駝馬牛羊數也已沙計又伏兵沙溝誘

殺都指揮王國安糾猛克什力犯雙山堡復犯波羅文煥擊破之追奔二十餘里當是時套寇號十萬然其衆分四十二枝多者二三千少不及千騎屢不得志沙計乃與吉能明愛猛克什力相繼納款延綏遂少事文煥尋以疾歸天啟元年再鎮延綏詔文煥援遼文煥乃遣兵出河套搗巢以致寇諸部大恨深入固原慶陽圍延安揚言必縛文煥掠十餘日始去命解職候勘奢崇明圍成都總督張我續請令文煥赴救至則圍已解偕諸軍復重慶崇明遁永寧文煥頓不進尋擢總理盡統川貴湖廣軍度不能制賊謝病去坐延綏失事罪戍邊七年起鎮寧夏寧錦告警詔文煥馳援俄令分鎮寧遠

進右都督調守關門尋引疾去崇禎元年錄重慶功廕指揮僉事三年陝西羣盜起五鎮總兵竝以勤王行總督楊鶴請令文煥署延鎮事兼督固原軍數敗賊賊亦日益多會山西總兵王國樑擊王嘉允於河曲大敗賊入據其城部議設一大將兼統山陝軍協討乃令文煥爲提督偕曹文詔馳至河曲絕饜道以困之神一元陷寧塞文煥家破遂留文詔令文煥西還四年御史吳牲劾其殺延川難民冒功給事中張承詔復劾之下獄褫職十五年用總督楊文岳薦以故官討賊無功復謝病歸子宏域天啟初歷延綏副總兵七年夏文煥援遼卽擢總兵官代鎮寧夏積資至右都督崇禎中提督池

河浦口二營練兵遏賊南渡頗有功十三年移鎮浙江尋謝

病去國變後文煥父子歸原籍崑山卒

明史

張景房字四槐常熟人萬曆己丑武進士歷任狼山總兵征白

蓮賊有功陞左軍都督出鎮四川松潘治軍嚴整有將畧

錢志

支可大字有功崑山人萬曆甲戌進士授禮部主事歷員外郎

郎中出為廣東提學副使移疾歸十年起為浙江提學歷江

西叅政應天府丞陞湖廣巡撫征播之役可大移鎮沅州降

九服白泥諸寨又破黃岑高巖乾溪寶兒固遂入播七戰塘

保破板角關三戰煉坪克苦菜關播平蔭一子告歸卒

張大復傳

舊志云按明史宦官傳言稅監陳奉在湖廣恣行貪虐慘毒備至士民公憤甘與奉同死而巡撫支可大護奉焚其轅門

及奉歸京金寶財物鉅萬計可大懼為民所掠多與徒衛導
之出疆楚民無不毒恨者可大之阿附陳奉史傳章章乃人
物傳言奉欲搆大獄可大揭其詐稱陛辭密語及沙市鼓譟
顛未為上分別言之上心動獄還解遮掩粉飾何足取信至
征播之功惟李化龍及劉綎最著可大亦因人成事而已人
物傳乃謂可大長驅入播十戰克捷之後經畧始至受成事
遂以播功延世賞而可大特任一子而已論者為之扼腕此
亦虛誇之語今以舊府志已載姑存征播一節餘俱刪削特
為證明且以見
邑志之難信也

黃時雨字化之常熟人萬曆甲戌進士除刑部主事遷郎中當

張居正一切繩下時雨獨持平出為惠州知府履畝清釐田

賦免鐵稅八百餘兩禁女子市易御史王度死靖難子孫戌

廣奏脫之岑岡夷長江月照者故剽寇李文彪黨也初王守

仁破池仲容時岑岡獨嶮遠不可下文彪死月照代有其眾

公行劫掠督撫遣兩指揮使招之月照答之百質其耳使復命督撫怒命副總兵率師勦之時雨移牒陳不可願假歲月斬賊督撫許之乃為手書令主簿邱懋入其巢陳禍福月照謾言抵攔時岑岡私人遍左右伺官府動息時雨廉得四人把其重負令取賊自贖以方寸紙用府印書免死字使持歸賊巢給降者署名為信得三千餘人月照弗覺也既遣邱懋歸椎牛鳴鼓聚眾如平時無應者再鼓如前月照計窮乃挺身詣府及城闔服毒死斬首以獻散其黨為良民寇始絕擢廣東副使再平海寇李茂陳德樂之亂遷雲南叅政乞歸養卒時雨天性卞直與人言蟬連不出口遇事明辨莫能奪持

身廉在粵十餘年不能自潤云

先賢事畧

蕭應宮字觀復常熟人萬厯甲戌進士知東昌府擒劇賊散其黨備兵臨洮邊境不靖應宮盛暑擐甲張疑設伏敵不敢犯會倭躡朝鮮應宮以遼海道監東征軍兼程趨王京止退守鴨綠之議既而揭制府昌功奏捷為所構遂徵下獄論戍奉

赦歸

江南通志參舊志

陳禹謨字錫元常熟人瓚子萬厯辛卯舉人授獲嘉教諭累陞兵部郎中遷四川僉事備兵川南長共盜起夷亦煽動禹謨擒斬其豪移檄諭降涼山夷石波等萬餘人尋遷貴州叅議分巡清都撫臣議勦下衛苗禹謨偵知平定諸夷為之謀主

誘斬之遂分兵拔其塞塞凡二十一其一曰馬蹄塞有洞險阻賊所窟穴用火攻殲焉叠石封戶鑱其石曰天焦紀功而還以一叅議專寄師旅所向克捷其功甚偉振旅入賀病卒於途贈亞中大夫禹謨記問該博嘗撰左氏兵畧以左爲經諸史爲緯上於朝又輯駢志說儲經言枝指廣滑稽志補北堂書鈔數百卷

舊志

劉錫元字玉受長洲人萬厯丁未進士厯官貴州提學僉事天啟元年永寧宣撫奢崇明反陷遵義貴陽大震巡撫李樸遣錫元與總兵官張彥方等援四川方告捷而貴州宣慰同知安邦彥反連陷諸城直趨貴陽時藩臬咸入覲城中文武無

幾李樸與巡按御史史永安分兵爲五令錫元及叅議邵應禎等分禦各門學官及諸生亦督民兵分守賊盡銳攻北城樸迎戰敗之轉攻東門爲錫元所却乃日夜攻擊城中食盡至生食人錫元議發兵護樸永安出城身畱死守會新撫王三善師進圍始解凡圍困三百日城中十萬戶存者千餘人孤城卒定皆錫元與樸永安功進右叅政吏部尙書趙南星等請更優敘卒無他擢遂還里崇禎中再任寧夏叅政

見明史李

樸傳

陳必謙字益吾常熟人曾祖交字汝同有至行由舉人官興寧知縣著廉聲必謙登萬厯癸丑進士知輝縣濬阜水萬泉等

河民利賴之擢南御史抗疏論挺擊紅丸二案罪人當窮治
削籍歸崇禎初起故官極論奄黨諸奸罪又陳京察當行六
事曰正紀綱明職業重操守破情面禁借端息黨議累擢都
御史巡撫河南時汴宋汝雒門所在皆寇必謙所部兵不滿
千人援勦邊兵多駐洛西必謙亟檄令主客兵分道殺賊邊
將左良玉部將李雲程趙柱累戰皆捷部將陳永福自陳趨
沈邱攻破賊賊分走潁鞏洛必謙曰濠潁接壤園陵不可再驚
而西賊又不容緩圖乃自引兵而西命陳永福率兵赴潁力
戰賊走黃州西賊亦奔洛西永寧靈寶告急必謙遣別將救
永寧而自救靈寶賊依朱陽山而陣師薄之賊潰走尸填川

谷別將亦敗賊於河底村已而賊帥號闖王者擁衆出關合
數部寇雒陽必謙督邊將左良玉祖寬等戰於九皋山又大
戰汝州圯料鎮斬賊帥闖搨天整齊王賊潰走或西入秦或
南入楚而闖賊由汝寧入南直界必謙上疏請專勦闖賊餘
黨當自定方議進兵會賊別部復自秦楚分道向雒闖賊乃
復進窺歸德開封必謙督諸將迎擊敗之度闖必西分兵備
汝雒賊果西諸將前後夾擊又破之會楚鄖二撫不能同心
而京師戒嚴邊帥在河南者皆召入衛賊勢復猖必謙轉戰
宛洛界上斬賊掃地王擒僞軍師金龍騰甚著勞績執政忌
其功遂以誤撫墮計土寇不戢二事爲罪解任歸必謙歸而

河南不可爲矣初帝嘗書天下清官四人於御屏首文震孟
次卽必謙次劉宗周次黃道周久之召爲工部侍郎晉尙書
未幾有甲申三月之難必謙被執得間亡歸發憤病死墓志
陳黃道字震芝常熟人幼而膂力過人精弓槊尤諳火攻法從
軍留都會東事告警入海偵探至旅順適大兵破總督王
某軍黃道救護總督敕印登舟颶風大作同舟無人色黃道
奮然曰馬革魚腹惟天所使僅而免達於留都上總督之勅
印爲信後隸兵部尙書范景文管水標營事時兵不滿千艘
不滿百黃道駐札水西門調度有方從景文擊闖獻兩賊血
戰安廬潛六間閣部史可法知其功授御營勇衛右營中遊

擊加銜授部劄福王監國以扈駕功贈封三代明亡後隱居

福山以終錢陸燦傳

本朝

○何棟字與偕長洲人由崇明籍舉順治丁亥進士除邵武府
推官攝福州府篆時閩師悉赴泉州經畧廈門會城空虛海
寇鄭成功率衆自海道襲福州巡撫宜永貴瘍發於首不能
視事因素重棟才盡以城守事委之棟力請釋原任布政使
周亮工於獄共扼險禦賊賊攻城十三晝夜棟竭力固守危
城獲全入爲戶部主事歷江西提學僉事告歸卒子炯字倬
雲煜字章漢並舉進士有名炯累官雲南僉事煜終南陽知

府志

○錢嘉字麟圖常熟人少孤貧奮欲樹立會討臺灣仗劍從軍署都司累戰立功官廣東春江協鎮嘗以二十五人射退峒黎署順德總兵官卒於任今子孫寄籍長洲

曾陶二志

○丁大業字宏謨吳江人雍正五年以武進士累遷至廣西普安營參將補右江總兵山谷嶮巖商賈不通營兵往往艱食奏請將公項抽發土州縣採買穀石以備兵食其俗尙鬼不知醫藥大業延醫分處各屬適瘴氣大發全活無算百色地深山邃谷毒蛇惡獸盤踞經大雨糞穢涎沫流入溪澗飲者立斃大業採明礬散給軍民令置缸甕貯水一淨以消其毒

尋調宣化鎮掛印總兵

賜上駟苑馬以事左遷授蔚州

路參將告歸沒子士偉乾隆乙酉科舉人官浙江衢州鎮守備五十一年調任臺灣協剿賊匪冬攻大肚溪鎗傷逆首林爽文左臂墜馬逃竄割取賊夥首級次日直搗賊穴奏書上達 賞戴花翎旋解逆首林爽文赴天津 行在疊荷

溫旨賞給緞疋等物陞授陝西固原鎮遊擊卒

江震續志稿

蘇州府志卷第八十八終

蘇州府志卷第八十九

人物志目錄

忠節上

三國吳

朱據 子熊 損 熊子宣

張純

晉

張禕

南北朝

陸超之

陸閑 子絳

張沖

張嶠

許孝敬

唐

張鑑

宋

邊知章

高祖肅

孫察

郭元邁

朱良

褚孜

王玠

鄭凝之

鳳濟

朱恂

滕茂實

兄禎

元

楊椿

陳普

明

鄧彥章

孟忠

黃鉞

張益

程式

子嵩

蔣欽

陳淮

趙士端

杜寅

劉政

龔詡

王永和

子汝賢
汝霖

汝敬

欽謙

唐天恩

父政

曾孫一麟

錢泮

徐察

宗禮

徐如珂

顧大章 弟大韶 從弟大武 子麟孫

周順昌

周宗建 沈義

王佐聖

張振德

蔡人龍 子至中

蘇州府志卷第八十九

人物

忠節上

三國吳

朱據字子範吳人有姿貌膂力又能論難黃武初徵拜五官郎中補侍御史權咨嗟將率發憤歎息追思呂蒙張溫以為據才兼文武可以繼之由是拜建義校尉領兵屯湖熟黃龍元年權遷都建業徵據尚公主拜左將軍封雲陽侯謙虛接士輕財好施赤烏九年遷驃騎將軍遭二宮構爭據據護太子言則懇至義形於色守之以死遂左遷新都郡丞未到中書令孫宏譖據因權寢疾宏為詔書追賜死時年五十七孫亮

時二子熊損各復領兵為全公主所譖皆死永安中追錄前

功以熊子宣襲爵雲陽侯尚公主孫皓時宣至驃騎將軍吳志

張純字元基吳人敦之子少厲操行學博才秀容止可觀拜郎

中補廣德令治有異績擢太子輔義都尉孫權廢太子和純

盡言極諫權幽之遂棄市吳書吳錄合纂

晉

張禕吳郡人敞之子少有操行恭帝為琅邪王以禕為郎中令

及帝踐阼劉裕以禕帝之故吏素所親信封藥酒一罌付禕

密令鳩帝禕即受命歎曰鳩君而求生何面目視息世間哉

不如死也因自飲之而死晉書子暢自有傳

南北朝

陸超之吳人為江州刺史晉安王子懋防閤以清靜雅為子懋

所知延興元年子懋聞鄱陽隨郡二王見殺欲起兵赴難與

超之議傳檄荆郢入討君側明帝遣軍主裴叔業先襲尋陽

遣將隨子懋參軍于琳之入城害子懋琳之勸超之逃亡超

之曰人皆有死此不足懼吾若逃亡非惟孤晉安之眷亦恐

田橫客笑人端坐待命超之門生姓周者謂殺超之當得賞

乃伺超之坐自後斬之頭墜而身不僵王元邈嘉其節厚為

殯斂周又助舉棺未出戶棺墜政壓其頭折即死南史齊晉安王子懋

傳

陸閑字遐業慧曉兄子有風概不苟合少爲同郡張緒所知仕至揚州別駕齊明帝崩閑謂所親曰宮車晏駕百司將聽冢宰主上地重才弱必不能振難將至矣乃感心疾不復預州事永元末刺史始安王遙光據東府作亂或勸去閑曰吾爲人吏何可逃死臺軍攻陷城閑以綱佐被收尙書徐孝嗣啟閑不預逆謀未及報徐世標命殺之閑四子厥絳完襄絳字魏卿時隨閑抱頸求代死不獲遂以身蔽刀刃行刑者俱害之

南史

張沖字思約邵孫柬之子出繼伯父敷沖少有至性隨從叔永爲將帥除盱眙太守齊永明八年爲假節監青冀二州行刺

史事父初卒遺命祭我必以鄉土所產無用牲物沖在鎮四時還吳國取萁菜每至烝嘗輒流涕薦焉仍轉刺史永元元年爲南兖州刺史遷司州裴叔業以壽春降魏又遷沖南兖州刺史並未拜崔慧景事平徵建安王寶夤還都以沖爲郢州刺史一歲之中頻受四州刺史至是乃受任封定襄侯梁武帝起兵手書喻意又遣辨士說之沖確然不回東昏遣驍騎將軍薛元嗣制局監暨榮伯領兵及糧運送沖使拒西師元嗣等懲劉山陽之敗疑沖不敢進停住夏首浦聞梁武師將至元嗣榮伯相率入郢城時竟陵太守房僧寄被代還至郢東昏敕僧寄留守魯山除驍騎將軍僧寄謂沖曰下官蒙

先帝厚澤實欲微立塵効冲深相許其結盟誓分部拒守遣軍主孫樂祖數千人助僧寄據魯山岸立城壘明年二月梁武圍魯山城遣軍主曹景宗等過江攻郢城冲中兵參軍陳光靜等間出擊之光靜戰死冲固守不出病將死厲府僚以誠節言終而卒東昏詔贈冲散騎常侍護軍將軍

南史

張岷字四山父稷初爲剡令至岷亭生之因名少敦孝行年三十餘猶斑衣受稷杖動至數百收淚歡然方雅有志操能清言感家禍終身蔬食布衣手不執刀刃不聽音樂弟淮言氣不倫岷垂泣訓誘起家秘書郎累遷鎮南湘東王長史尋陽太守王暇日爲之筮得節卦謂岷曰卿後當東入爲郡恐不得終其天年岷曰貴得其所耳還爲太府卿吳興太守侯景圍建業遣弟伊率郡兵赴援城陷御史中丞沈浚違難東歸岷往見之謂曰賊臣憑陵人臣効命之日今欲收集兵刃保據貴鄉雖復萬死誠亦無恨浚固勸岷舉義時邵陵王綸東奔至錢塘聞之遣前舍人陸邱公板授岷征南將軍岷曰天子蒙塵今日何情復受榮號留相而已賊行臺劉神茂攻破義興遣使說岷岷斬其使仍遣軍破神茂侯景乃遣其中軍侯子鑿助神茂擊岷岷軍敗乃釋戎服坐於廳事賊臨以刃終不屈執送景將舍之岷曰速死爲幸乃殺之子弟遇害者十餘人景欲存其一子岷曰吾一門已登鬼籙不就爾處求

恩於是皆死賊平元帝追贈侍中中衛將軍開府儀同三司

諡忠貞

南史

許孝敬吳人小名嗣兒勁勇過人為梁主督驍將以大將軍守

河東陳將吳明徹來攻無救援為明徹所禽戮於建康市贈

車騎大將軍

南史

唐

張鑑字秀權一字公度崑山人後允五世孫朔方節度使齊邱

子鑑以蔭授右衛兵曹參軍郭子儀表為元帥府判官累遷

殿中侍御史乾元初華原令盧樅以公事譙責邑人齊令誅

令誅宦人也衡之構樅罪鑑按驗當免官有司承風以死論

謚不直之乃白其母曰今理樅樅必免死而鑑坐貶默則負

官貶則為太夫人憂敢問所安母曰兒無累於道吾所安也

遂執正其罪樅得流鑑貶撫州司戶參軍徙晉陵令江西觀

察使張鎬表為判官遷屯田右司二員外郎居母喪以孝聞

大厯初出為濠州刺史政條清簡延經術士講教生徒比去

州升明經者四十餘人李靈曜反於汴鑑團閱鄉兵嚴守禦

有詔褒美擢侍御史緣淮鎮守使以最遷壽州刺史厯江西

河中觀察使不閱旬改汴滑節度使以病固辭詔留私第建

中二年拜中書侍郎同中書門下平章事郭子儀壻太僕卿

趙縱為奴告下御史劾治而奴留內侍省鑑奏言貞觀時著

令奴告王者斬頃悖慢成風漸不可長今縱事非叛逆而奴留禁中獨下縱獄情所不厭帝納之杖奴死盧杞忌鑑剛直欲去之時朱泚以盧龍卒戍鳳翔帝欲擇人以代杞卽謬曰鳳翔將校班秩素高非宰相信臣不可鎮撫臣宜行帝不許乃顧鑑曰文武兼資內外望重無易卿者其爲朕撫盧龍士乃以爲鳳翔節度使鑑知爲杞陰中然辭窮因再拜受詔帝幸奉天鑑罄家貲將獻行在而營將李楚琳者嘗事朱泚得其心司馬齊映等謀曰楚琳必爲亂乃遣屯隴州楚琳知之夜率其黨作亂鑑縋城走不及遠與二子爲候騎所執楚琳殺之贈太子太傅

唐書

宋

邊知章字公望吳人裕子崇寧五年進士國子監書庫官京畿京西路提舉鹽香司管幹公事歷永靜軍通判律學博士通判開德府以年勞賞典遷官累朝請郎靖康初金人犯闕尋以和議退澶淵營孔道明年春告滿代者避禍愆期金人將復動或勸知章逃去知章抵書平江諸弟以爲去歲兵至宜敵不敵今歲旣盟宜和不和速禍必矣苟求幸逃豈不愧守邢匿詔事乎藉使非力所能而死當見吾祖地下無靦顏其冬金人至城下軍潰於內遂死之年四十七贈朝散大夫官其一子尋復命其幼者子維嶽知袁州維熊通判紹興府初

知章高祖肅真宗朝爲兵部郎中知邢州澶淵之役密詔便
宜退保肅匿詔抗敵併納傍郡鎮魏六州老弱全活者數十

萬故知章以自勵云

盧志

王玠字介玉長洲人倜儻負氣節酒酣常舞劍爲樂徙居鄂州
黃庭堅謫官來鄂玠以文贄見大蒙稱賞庭堅贈以詩由是
有聲江湖間紹興初孔彥舟爲舒蘄鎮撫使奏爲幕屬初權
邦彥知東平彥舟隸麾下因事叛去又聞邦彥簽書樞密心
自不安又宣州韓世清伏誅及韓世忠自湖外破劉忠俘馬
友順流東下彥舟疑其圖已遂有異志問計於玠玠正色答
之曰總管被命鎮撫二州任優祿厚豈可負朝廷自陷不義

論以順逆凡數百言彥舟怒囚之越數日復問之玠曰君不
能與韓公爭先立功以報君父乃甘心與逆賊爲比而慮其
見圖苟欲富貴能建大勲於國家則可何獨北虜能富貴人
哉君誠欲反幸先殺我孰謂王玠而從賊耶彥舟竟沈玠於
龍眼磯與妻子俱死時紹興二年六月十三日也彥舟旣殺
玠引兵北降劉豫初玠赴彥舟之辟或止之玠曰吾慮之熟
矣彼方駐兵於此姑爲鄉井計倘能息其暴戾固非玠一身
之計也及被害鄉人悲其志爲立廟磯上周燔賦哀詞刻石

焉

盧志

孫察崑山人朝議大夫載之從子父臨大理評事察以朝散郎

奉使金國守節不屈金人裹以油絮焚之罵聲不絕口而死

盧志

朱良字良伯吳郡人祖公綽光祿卿父季端爲郎屢典名郡良仕海鹽尉建炎四年金人犯順車駕南幸分兵入縣境良謂僚友曰今日乃忠臣義士死國之時也被甲持戈集射士百餘奮而前金兵數人死衆爲披靡然力不敵竟死同郡時有武舉進士保義郎褚孜爲永康尉賊衆犯州與兩浙兵馬鈐轄閻章婺州諸縣弓手將領馬珍俱被害事聞官良之子思孜等亦各贈三官恩澤兩資思後以朝議大夫知漢陽軍贈

良銀青

盧志

郭元邁字英遠吳人附之孫博通經史入太學魁上舍建炎二年應募奉使時建安魏行可假禮部侍郎充河北金人軍前通問使元邁以右武大夫和州團練使爲之副行次河易以尺紙付家云出疆當藉棘時難保全生此身已許國矣至金上書其師黏罕乞歸二聖金人留之不遣尙書洪皓北歸言其以身殉國棄之不取緩急何以使人元邁不肯髣髮換冠

卒於虜中

盧志 按宋史 附見魏行可傳

鄭疑之吳人戩孫建炎中爲浙西安撫司機宜建康潰卒戚方犯鎮江知府胡唐老遇害疑之亦以兵死詔官其家一人

宋史

豚茂實字秀穎吳人元發從子也

元發見流寓

初名裸重和元年上

舍登第徽宗改賜今名官至奉議郎靖康初金人入寇朝議
割三鎮以和茂實由水部員外郎假工部侍郎副簽書路允
迪出使河東割地太原陷允迪還至代州金人獨留茂實先
是茂實兄禎亦在虜中故黏罕聞茂實名將屈爲用亦遷之
代復從京師取其弟華實以慰其意常使人諭茂實易戎服
又驅巾幘稍高者數人至前殺之屢加逼脇茂實弗動顧莫
能生還乃自爲哀詞復篆宋工部侍郎滕茂實墓九字裹以
奉使黃旛密授其友朔寧府司理董詵屬以後事欽宗自出
都城舊臣無敢候問起居者洎過代州茂實具冠裳迎謁拜
伏號慟州民爲之感泣金人謂之曰國破主遷所以留公蓋

將大用茂實請從舊臣俱行金人不許遂留鴈門董詵拔歸
茂實爲之泣別自述其出處附表以聞茂實竟憂憤成疾卒
金人哀其忠爲起墓臺山寺歲時祀之建炎二年詵以茂實
哀詞言於張浚浚以詵爲陝西轉運判官上其死節宣付史
館紹興二年追贈龍圖閣直學士官其家三人後謚忠節紹
定中知平江府吳淵立祠於學官禎歷蘇州糧科院勾當新
城右廂公事大宗正丞通判代州官朝議郎金人犯順邊郡
望風降避禎率衆城守不下力屈援絕爲虜所拘劉豫與解
州鹽利以太府卿召執節不辱而死二子彪彪俱陷虜中禎
弟禘以蔭補官歷知榮州廣安軍貴州茂實子修字敏叔以

恩補官歷平江府司戶監常州比較務衢州司法知蕪湖縣

官至宣義郎

盧志

鳳濟吳縣人祖汴梁副統制鳳韜謫為角頭寨巡檢其子廷珮遂家於包山濟字時浦廷珮子為人奇偉有祖風以材武起為濠梁步軍都督紹定三年楚州降盜李全叛犯揚州攝州事趙璣去檄告諸郡求救濟率濠梁所部兵往遇全軍於揚州城下當是時全軍不下數萬濠梁兵止千餘人又皆步卒濟奮力搏戰所部皆沒身中大創十餘病甚不能軍大帥趙范聞之令歸養息濟乃解官歸包山居久之具區中絳巾賊起所至焚掠勢張甚山民懼咸思遠竄濟歎曰古之人多有

布衣而保障鄉里者况我夙為武臣忍聽賊之蹂吾鄉乎乃慰留鄉人簡練其壯勇者授兵而設砦焉景炎元年三月甲午濟率鄉民擊賊於長沙山陷賊覆中格鬪一日夜不得出濟力已竭乃曰吾將家子不可為賊所執以貽吾祖羞遂赴水死越三日尸忽漂至岸側葬之日風雨雷電自成高塚鄉人以為神立廟祀之私謚為義勇鳳公

歐陽元撰傳

朱恂居聞湖之濱宋末官進義校尉殉崖山之難

盛湖志

元

楊椿字子壽其先少師棟由蜀來吳遂為吳人椿少聰敏讀書過目成誦及壯試於有司屢黜而志益勵尤好為古文詞丙

申歲元總兵參政脫寅時守吳辟椿為參謀俾守婁門甫二日張士德引兵至門下衆潰去椿獨擐甲持弓禦之身被數創勢不支且大罵兵以戟裂其口血被體罵不絕而死其妻王氏披髮徒跣冒鋒鏑尋尸三日不得幾被刃者數四既又擗踊抱城門柱大呼誅其魁曰人孰無夫婦汝等專務殺人而來耶却欲為安民之計耶魁聽之禁其兵勿沮其往來乃得尸於張香橋下輿歸葬之哀毀不食翌日夫之神憑王大言曰我已死汝無他志期五日當取汝與吾子女同歸及期王果死子穎十五歲女滿奴九歲皆一日亡其徒陳普字季周郡人也好學而文尚氣節士德之入吳兵踵普門使拜不肯屈且索婦女普罵曰若所為寇耳遂被數創死盧志

四

鄧彥章字朝用常熟人洪武中以賢良方正擢御史清介忠直

以諫賜死

江南通志

杜寅字彥正吳縣人洪武初詔修元史徵寅為纂修官史成官

岐寧衛知事八年番賊既降復叛寅與經歷熊鼎俱被害

明史

孟忠字廷臣崑山人洪武初以賢良薦授武寧知縣革除後文皇帝思高帝舊臣欲召用堅辭不赴賜勅嘉之以壽終於家

舊志

劉政字仲理長洲人敏弟聰明力學明春秋建文元年方孝孺

至應天鄉試以託孤寄命為題得政卷曰此鳥中孤鳳當虛
左待之擢第一燕兵起感慨不食草平燕策將上之臥疾未
得行數問其家人燕兵得無渡江乎家人秘不以告京師既
定久乃知之怒其家人不早言頓足榻前嘔血死

文震孟姑蘇名賢小

紀朱國楨遜國臣傳合纂

黃鉞字叔揚常熟人少好學家無書從市肆借觀輒記憶不忘
時天下初定重法繩下士不樂仕其父屢懲之不能止家有
田在葛澤陂因令督耕其中有楊澹者家多藏書見鈔勤讀
邀至舍與其子福同居縣聞之并辟福澹恚以越為累其子
鉞教福結束如農夫有所問第操吳音如其言縣果獨遣鉞

授宜章典史建文元年舉湖廣鄉試明年第進士授刑科給
事中陞戶科左又改禮科三年丁父憂方孝孺弔之屏人問
曰燕兵日南蘇常鎮江京師左輔也君吳人朝廷近臣今雖
去宜有以教我鉞曰三府惟鎮江最要害守非其人是撤垣
而納盜也指揮童俊狡不可任奏事上前視遠而言浮心不
可測也蘇州知府姚善忠義激烈有國士風然仁有餘而禦
下寬恐不足定亂耳國家大勢當守上游兵至江南禦之無
及矣孝孺乃因鉞附書於善善得書與鉞相對哭誓死國鉞
至家依父殯以居燕兵至江上善受詔統兵勤王以書招鉞
鉞知事不濟辭以營葬畢乃赴既而童俊果以鎮江降燕善

為麾下縛去鉞初聞變不食後稍食及聞善死起登琴川橋
西向再拜祀善哭曰吾與君同受國恩今君與希直同死吾
忍獨生乎祀畢給家人歸祭具整衣冠入水死時收善黨急
且訛言將錄鉞家親族悉驚伏楊福具棺衾日夜泣橋側求
鉞屍更數日屍忽自出立水中體猶未潰成禮葬之明末追
諡文獻 本朝乾隆四十一年奉 旨賜諡忠節 明史參
楊儀傳

獻徵錄及 欽定勝朝殉節錄 舊志云明史童俊以鎮
江降燕下云鉞聞國變杜門不出明年以戶科左給事召半
途自投於水以溺死聞故其家得不坐按此與諸書皆不同
而琴川橋事邑人相傳至今故從儀傳及獻徵錄又楊淡福
父子事及方孝孺來弔屏人語或言鉞無此事乃楊儀假託
然吾學編獻徵錄明史皆據此立傳蓋傳聞既久未可因一
二人之言 而遽削也

龔詡字大章崑山人父晉洪武中為給事中謫戍五開詡甫三

歲從母王依外家未幾晉死戍所勾伍之牒旁午賴宗人保

持之 張大復傳云賴宗人清惠公保持之按清惠公者龔理
也理於正統元年始登第是時恐尚未生或是理之父

賢然不 年十四白母詣闕候補得遼陽調守金川門燕兵逼
可考矣

金川谷王榭開門降守者奔潰詡奮戈不中走郊外回顧宮

中火起乃大慟亡命變姓名王大章匿江陰常熟間然時竊

竊聞追討聲夜走任陽投馬陳二家二家故多藏書修朱家

郭解之義乃匿之大困中即困中讀書几榻盡穿多所纂述

間夜渡婁省母禁稍解賣藥授徒更二十餘年人固知之無

告者宣德中詔寬軍伍始得歸時周文襄忱撫吳聞其賢具

禮訪問便宜爲條上二十事次第行之母卒詔已斑白悲號
毀瘠久之忱欲處以師儒之任兩薦爲松江太倉學官不就
曰詔老兵仕無害恐負往日城門一慟耳因泣下忱歎息而
去晚隱虞浦無子獨與一老婢居破廬中有田三十畝種豆
植麻歌咏自得成化三年年八十八整衣端坐口誦大學首
章而逝有白氣起屋上門人私謚安節先生萬厯初詔錄遜
國諸臣撫臣張佳引疏請建祠學宮之西

王張二傳
參列縣志

本朝

乾隆四十一年奉 旨入祠

張益字士謙吳縣人少長京師登永樂乙未進士選庶吉士授
中書舍人轉大理評事與修宣廟實錄書成遷翰林修撰進

侍讀學士入內閣典機務正統末死土木之難贈翰林學士
諡文僖益爲人清淳端謹文章圓熟對客數千言援筆立就
楷書亦工初益與夏景同年及見陳嗣初王孟端俱喜作文
寫竹後景見益作石渠閣賦出已上遂不復作文益見景竹
妙絕亦不復寫竹竟各以其所能名世

姑蘇志 明史附見
王綬傳作上元人

王永和字以正

陳循墓碑姑蘇
志俱作字用節

崑山人少至孝父病伏枕十八

年侍湯藥無少懈永樂甲午舉於鄉歷嚴州饒州訓導以蹇
義薦爲兵科給事中嘗刻都督王或鎮薊州縱寇及錦衣馬
順不法事持節册韓世子妃紉中宮蹇傲罪以勁直聞正統
六年進都給事中八年擢工部右侍郎十四年從征至土木

死之贈工部尚書官其子汝賢大理評事後諡襄敏

明史次子

汝敬天順己卯舉人汝霖正統戊辰進士歷官河南右布政

使奉公郵民有父風

縣志

程式字以則常熟人舉進士授南京兵部主事遷刑部員外郎

以明允稱土木之變扈從死難贈奉訓大夫蔭子嵩仕至延

平府同知所著有兵政十策葩經衍義

管志

欽謙吳縣人官太醫院判宣宗數召見問祕方三問以不知對

最後謙伏地曰臣以醫職在保護聖躬下承祖宗鴻業宜兢

兢自愛若此等方藥先賢不傳臣死不敢承旨宣宗怒命武

士以旃裹頭付詔獄久之上悔悟釋出復其官正統末隨駕

出關殉土木之難

江南通志

蔣欽字子修常熟人宏治九年進士授衛輝推官擢南京御史

數有論奏正德元年劉瑾逐大學士劉健謝遷欽偕同官薄

彥徽等切諫瑾大怒逮下詔獄廷杖為民居三日欽獨具疏

曰劉瑾小豎耳陛下親以腹心倚以耳目待以股肱殊不知

瑾悖逆之徒蠹國之賊也忿臣等奏留二輔抑諸權奸矯旨

逮問予杖削職然臣思畎畝猶不忘君况待命衽席日擊時

弊烏忍不言昨瑾要索天下三司官賄人千金甚有至五千

金者不與則貶斥與之則遷擢通國皆寒心而陛下獨用之

於左右是不知左右有賊而以賊為腹心也給事中劉蒞指

陛下闇於用人昏於行事而瑾削其秩撻辱之矯旨禁諸言官無得妄生議論不言則失於坐視言之則虐以非法通國皆寒心而陛下獨用之於前後是不知前後有賊而以賊爲耳目股肱也一賊弄權萬民失望愁嘆之聲動徹天地陛下顧懵然不聞縱之使壞天下事亂祖宗法陛下尙何以自立乎幸聽臣言亟誅瑾以謝天下然後殺臣以謝瑾使朝廷一正萬邪不能入君心一正萬欲不能侵臣之願也今日之國家乃祖宗之國家也陛下苟重祖宗之國家則聽臣所奏如其輕之則任瑾所欺疏入再杖三十繫獄越三日復具疏曰臣與賊瑾勢不兩立賊瑾蓄惡已非一朝乘間起釁乃其本

志陛下日與嬉遊茫不知悟內外臣庶凜如冰淵臣昨再疏受杖血肉淋漓伏枕獄中終難自默願借上方劍斬之朱雲何人臣肯少讓陛下試將臣較瑾瑾忠乎臣忠乎忠與不忠天下皆知之陛下亦洞然知之何仇於臣而信任此逆賊耶臣骨肉都銷涕泗交作七十二歲老父不顧養矣臣死何足惜但陛下覆國喪家之禍起於旦夕是大可惜也陛下誠殺瑾梟之午門使天下知臣欽有敢諫之直陛下有誅賊之明陛下不殺此賊當先殺臣使臣得與龍逢比干同遊地下臣誠不願與此賊並生疏入復杖三十方欽屬草時燈下微聞鬼聲欽念疏上且掇竒禍此殆先人之靈欲吾寢此奏耳因

整衣冠立曰果先人盍厲聲以告言未已聲出壁間益悽愴
欽嘆曰業已委身義不得顧私使緘默負國為先人羞不孝
孰甚復坐奮筆曰死即死此橐不可易也聲即止杖後三日
卒於獄年四十九瑾誅贈光祿少卿嘉靖中賜祭葬錄一子

入監明史 錢志南都賜諡忠烈又龔志欽父綺
通經博古欽歿後尚善飯享年九十有六

唐天恩字堯仁常熟人宏治十一年舉於鄉授葉縣知縣正德
六年盜起河朔天恩增城塹池繕修器械流賊趙璲徐彥明
等哨馬千餘臨城天恩率兵奮戰擒戮數十人賊引去是歲
十月劇盜劉七徒黨尤盛抵城下攻圍甚急天恩嬰城固守
二十餘日外無強援城遂陷賊執天恩及其父政懸於縣庭

叢射殺之庶母任氏二妹皆遇害妻錢氏子詩臥亂屍下得

脫事聞贈光祿少卿賜祭蔭一子仍賜子孫為儒籍復其身

後巡按御史華珩疏請敕建專祠有司春秋致祭鄧管龔三
志合纂

附見錢志天恩曾孫一麟母患痰疾幾殆一麟日
夕焚香請代忽大笑數聲而卒卒三日而母愈

陳淮字禹治崑山人父周為新昌令改教青州卒淮持父喪歸

遇盜淮抽矢擬之盜引去當時武健年少爭傳為盛事而淮

故以文章自負每下筆滾滾不休嘉靖甲寅倭寇至淮請授

甲扞東賊賊梯木將登淮發弩連斃四人轉攻南門淮復斃

二人城中人人自奮號為陳先鋒明年賊酋五十七人入靈

巖山梟悍莫禦淮率家丁詣督府請自効督府壯之授藍號

信幟督領嚴家兵馬為奇兵衝突兵未集猝與賊遇淮揮刀
馳之接戰甚力莫有應者遂遇害家丁吳循文瑞來祥皆死
之越二日得淮屍色如生後三十餘年遺生子應期舉於鄉
瀝血上訴詔旌其門立忠烈祠祀之

張大復傳

錢泮字鳴教常熟人嘉靖十四年進士知侯官縣調繁慈谿擢
刑部主事志員外郎郎中出知順慶府遷陝西副使備兵漢
中嘗發粟賑饑全活甚眾後陞江西參政丁父憂既歸而倭
亂作邑令王鈇善騎射時時從泮把酒談兵泮有兩蒼頭亦
善射倭自吳門劫關稅巨萬奪民船載之取道向湖入江泮
與鈇率兵追至讓塘猝與倭戰伏四起遂俱遇害事聞詔贈

光祿卿諭祭建祠蔭一子錦衣百戶世襲時有徐察者統家

丁百人拒賊三丈浦生擒韓龍三大王法智等斬獲甚眾王

錢之難察亦死之詔贈官蔭子察恪之後也

舊志

趙士端字叔正常熟人以歲貢授仙居訓導倭寇仙居合被害
知士端為學博也將釋之士端瞋目大罵倭斷其首止以身

歸葬

錢志

宗禮常熟人世官應天衛千戶歷都督僉事驍勇敢戰嘉靖間
以倭亂調援浙西遇賊帥徐海於阜林三戰三捷以九百騎
破其萬眾海辟易稱為神兵論者謂軍興以來血戰功第一

竟沒於陣詔贈都督同知諡忠壯賜祠阜林

江南通志

徐如珂字季鳴吳縣人萬曆二十三年進士除刑部主事歷郎中主事謝廷讚疏請建儲帝怒盡貶刑曹官如珂降雲南布政司照磨累遷南京禮部郎中廣東嶺南道右參議暹羅貢使餽犀角象牙如珂不受天啟元年遷川東兵備副使時奢崇明亂蜀成都圍雖解而重慶爲賊黨樊龍張彤等所據其地三面阻江一面通陸如珂率兵從間道繞出佛圖關後與女土宮秦良玉攻拔之崇明發卒數萬來援如珂迎戰檄同知越其杰躡賊後殺萬餘人樊龍張彤皆死遂復重慶奉檄搗蘭州土城賊借水西兵十萬來援前軍少却捍子軍覃懋勳挽白竹弩連中之賊大潰轉戰數十里斬首萬餘級遂拔

蘭州崇明父子竄水西去乃召如珂爲太僕少卿轉左通政魏忠賢逐楊漣如珂郊餞之忠賢銜甚遷光祿卿修公廨竣疏詞無所稱頌六年春周順昌被逮緹騎激變閩欲盡坑吳民禍且不測如珂抗言蘇州財賦重地不可重擾且所連引俱係人望宜以東漢末爲鑒復以全家百口保吳民不反計給同鄉之枋國者從中曲挽得從寬典順昌誣賊三千醵金代完及斃獄後經紀其喪不避形迹以故閩益恨之九月廷推南京工部右侍郎遂削籍旣行遣盜殺之不獲歸里半月知閩怒未已治具飲客夜分飲藥卒崇禎初以原推起用死歲餘矣尋錄破賊功賜祭葬進秩一等官一子

舊志參江南通志 舊志

云所謂同鄉枋國者闖黨顧秉謙也

顧大章字伯欽常熟人雲程子與弟大韶學生舉萬曆三十五年進士授泉州推官乞改常州教授父喪除值朝中朋黨角立正士日摧大章慨然曰昔賈彪不入顧厨之日卒西行以解其難余向與東林疏可以彪自况也乃入都補國子博士與朝士通往來陰察其交關肯綮清流賴之稍遷刑部主事天啟改元進員外郎尚書王紀令署山東司事司轄輦轂最難任自遼陽失五城及京營巡捕日以邏奸細為事稍有蹤迹率論死絕無左驗者二百餘人所司莫敢讞多徙官去囚未死者僅四之一大章言於紀曰以一身易五十人命且甘

之矧一官乎即日會讞繫二人餘悉移大理釋放紀大嗟服

佟卜年之獄紀用大章言擬流卜年未上而紀斥侍郎楊東

明署事欲寘之大辟大章力爭卒擬流忤旨詰責竟論卜年

辟瘐死獄中魏忠賢欲借劉一燾株累劉一燾大章力辨其

非忠賢大恨

卜年一獄事具明史王紀劉一燾傳中

熊廷弼王化貞之下吏也

法司諸屬二十八人共讞多有議寬廷弼者大章因援議能

議勞例言化貞宜誅廷弼宜論戍然二人卒坐死大章亦遷

兵部去無異議也會王紀劾罷徐大化又疏刺客氏其黨疑

紀疏出大章手恨之大化令所親御史楊維垣訐大章妄倡

八議鬻大獄大章疏辨維垣四疏力攻言納廷弼賄四萬且

列其鬻獄數事反覆詆訐不休大章危甚賴座主葉向高保
持之下所司驗問都御史孫瑋等白其誣帝以大章瀆辨稍
奪其俸大章遂引歸五年起官歷禮部郎中陝西副使大化
已起大理丞與維垣爲忠賢鷹犬因假汪文言獄連及大章
逮下鎮撫拷掠坐贓四萬及楊漣等五人旣死羣小聚謀謂
諸人潛斃於獄無以厭人心宜付法師定罪明詔天下乃移
大章刑部獄由是漣等慘死狀外人始聞比對簿大章詞氣
不撓刑部尙書李養正等一如鎮撫原詞以移宮事牽合封
疆坐六人大辟爰書旣上忠賢大喜矯詔布告四方仍移大
章鎮撫大章慨然曰吾安可再入此獄呼酒與大韶訣趣和
藥飲之不死投繯而卒崇禎初贈太僕卿官其一子福王時
追諡裕愍初大章等被逮秘獄中忽生黃芝光彩遠映及六
人畢入適成六瓣或以爲祥大章嘆曰芝瑞物也而辱於此
吾輩其有幸乎已而果然大韶字仲恭老於諸生通經史百
家及內典於詩禮儀禮周官多所發明他辨駁者復數萬言
嘗以爲宋元以來述者之事備學者但當誦而不述將死始
繕所箋詩禮莊子曰炳燭齋隨筆云大章從弟大武字武仲
權竒倜儻以古豪傑自命大章被急徵大武傾身入長安職
納橐餽一夕垣中白氣亘北斗大武故諳曉星象指而泣曰
諸君子其不免乎已而楊左六公并命大武護大章喪歸益

自放於酒未幾歿大章子麟孫志氣豪邁好讀書年十五大章遭奄禍及烈廟昭雪死事而大章以封疆一案爲逆黨把持止於贈官麟孫赴闕頌寃帝詔法司改定爰書周延儒之再相也錢謙益致書勸其起用馮銓麟孫知其事而洩之於人謙益大恨欲寘之死因徙居吳門所著詩文有進履齋草

舊志

周順昌字景文吳縣人萬曆四十一年進士授福州推官捕治稅監高宍爪牙不少貸宍激民變劫辱巡撫袁一驥質其二子并質副使呂純如或議以順昌代順昌不可純如以此銜順昌擢吏部稽勲主事天啟中厯文選員外郎署選事力杜

請寄抑僥倖清操嚼然乞假歸順昌爲八剛方貞介疾惡如讐巡撫周起元忤魏忠賢削籍順昌爲文送之指斥無所諱魏大中被逮道吳門順昌出餞與同臥起者三日許以女聘大中孫旗尉屢趣行順昌曠日曰若不知世間有不畏死男子邪歸語忠賢我故吏部郎周順昌也因戟手呼忠賢名罵不絕口旗尉歸以告忠賢御史倪文煥者忠賢義子也誣劾同官夏之令致之死順昌嘗語人他日倪御史當償夏御史命文煥大恚遂承忠賢指劾順昌與罪人婚且誣以贓賄忠賢卽矯旨削奪先所忤副使呂純如順昌同郡人以京卿家居挾前恨數譖於織造中官李實及巡撫毛一鷺已實追論

周起元遂誣順昌請囑有所乾沒與起元等並逮順昌好爲德於隣有冤抑及郡中大利害輒爲所同陳說以故士民德順昌甚及聞逮者至衆咸憤怒號冤者塞道至開讀日不期而集者數萬人咸執吾爲周吏部乞命諸生文震亨楊廷樞王節劉羽翰等前謁一鷺及巡按御史徐吉請以民情上聞旗尉厲聲曰東廠逮人鼠輩敢爾大呼囚安在手擲銀鐺於地聲琅然衆益憤曰始吾以爲天子命乃東廠邪蠹擁大呼勢如山崩旗尉東西竄衆縱橫毆擊斃一人餘負重傷踰垣走一鷺吉不能語知府冠慎知縣陳文瑞素得民曲爲解諭衆始散順昌乃自詣吏又三日北行一鷺飛章告變東廠刺

事者言吳人盡反謀斷水道劫漕舟忠賢大懼已而一鷺言縛得倡亂者顏佩韋馬傑沈揚楊念如周文元等亂已定忠賢乃安然自是緹騎不出國門矣順昌至京師下詔獄許顯純鍛鍊坐贓三千五日一酷掠每掠治必大罵忠賢顯純椎落其齒自起問曰復能罵魏上公否順昌噴血唾其面罵益厲遂於夜中潛斃之時六年六月十有七日也明年莊烈帝卽位文煥伏誅實下吏一鷺吉坐建忠賢祠純如坐頌璫並麗逆案順昌贈太常卿官其一子給事中瞿式耜訟諸臣冤稱順昌及楊漣魏大中清忠尤著詔諡忠介又從其子茂蘭請以所贈官推及其祖父給三世誥命建祠賜額佩韋等皆

市人文元則順昌輿隸也論大辟臨刑五人延頸就刃語寇慎曰公好官知我等好義非亂也監司張孝流涕而斬之吳人感其義合葬之虎邱旁題曰五人之墓其地卽一鷺所建忠賢普惠祠址也

明史

周宗建字季侯吳江人尙書用曾孫萬厯四十一年進士除武康知縣調繁仁和有吳政入爲御史天啟元年遼事方棘上疏責備輔臣無何瀋陽破宗建責當事大臣益急因請破格用人召還熊廷弼是歲冬奉聖夫人客氏旣出宮復入宗建首抗疏極諫忤旨詰責明年廣寧失廷臣多庇王化貞欲甚熊廷弼罪宗建不平爲剖兩人罪案頗右廷弼諸庇化貞者

乃深疾宗建京師久旱五月雨雹宗建謂陰盛陽衰之徵歷陳四事一專譏大學士沈淮一請寬建言廢黜諸臣一言廷弼已有定案不當因此羅織朝士陰刺兵部尙書張鶴鳴給事中郭鞏一則專攻魏進忠畧言近日政事外廷嘖嘖咸謂奧窔之中莫可測識諭旨之下有物憑焉如魏進忠者目不識一丁而陛下假之囁笑日與相親一切用人行政墮於其說東西易向而不知邪正顛倒而不覺况內廷之借端與外廷之投合互相扶合離間之漸將起於蠅營讒構之釁必生於長舌其爲隱禍可勝言哉進忠者魏忠賢故名也時方結客氏爲對食廷臣多陰附之其勢漸熾見宗建疏銜刺骨未

發也鄒元標建首善書院宗建實司其事元標罷宗建乞與俱罷不從巡視光祿與給事中羅尙忠力剔奸弊節省爲多尋請核上供器物中官怒取旨詰責宗建等再疏力持中人滋不悅給事中郭鞏者先以劾廷弼被謫廷弼敗復官遂深結進忠知進忠最惡宗建乃疏詆廷弼因詆朝廷之薦廷弼者而宗建與焉其鋒甚南京御史涂世業和之詆宗建誤廷弼且誤封疆宗建憤疏駁世業語侵鞏抉其結納忠賢事鞏亦憤上疏數千言詆宗建益力并及劉一璟鄒元標周嘉謨楊漣周朝瑞毛士龍方震孺江秉謙熊德陽輩數十人悉指爲廷弼逆黨宗建益憤抗疏力駁其謬當是時忠賢勢益

盛宗建慮內外合謀其禍將大三年二月遂抗疏直攻忠賢畧言臣於去歲指名劾奏進忠無一日忘臣於是乘私人郭鞏入都嗾以傾臣并傾諸異己者鞏乃初爲新幽大幽之說把持察典編廷臣數十人姓名爲一冊思一網中之又爲匿名書羅織五十餘人投之道左給事中則劉宏化爲首次及周朝瑞熊德陽輩若而人御史則方震孺爲首次及江秉謙若而人而臣亦其中一人也旣欲羅諸臣以快報復之私更欲獨中臣以釋進忠之恨是察典不出於朝廷乃鞏及進忠之察典也幸直道在人鞏說不行始別借廷弼欲一筭陷之先朝汪直劉瑾雖皆梟獍幸言路清明臣僚隔絕故非久卽

敗今權璫報復反借言官以伸言官聲勢反借權璫以重數月以來熊德陽江永謙侯震暘王紀滿朝薦斥矣鄒元標馮從吾罷矣文震孟鄒鄭逐矣近且扼孫慎行盛以宏而絕其揆路摘瓜抱蔓正人垂足舉朝各愛一死無敢明犯其鋒者臣若尙顧微軀不爲人告將內有進忠爲之指揮旁有容氏爲之羽翼外有劉朝鞏爲典兵示威而又有鞏輩蟻附蠅集內外交通驅除善類天下事尙忍言哉疏入進忠益怒率劉朝等環泣帝前乞自髡以激帝怒乃令宗建陳交通實狀將加重譴宗建回奏益侃直進忠譏廷杖之閣臣力爭乃止奪俸會給事中劉宏化御史方大任等交章助宗建攻進忠鞏

鞏復力詆諸人詔下諸疏平議廷臣爲兩解之乃嚴旨切責奪鞏宗建俸三月是時劉朝典內揀遂謀行邊廷臣微聞之莫敢言宗建乃抗疏極諫歷陳三不可九害會朝與進忠有隙事亦中寢其冬出按湖廣以憂歸五年三月大學士馮銓銜御史張慎言嘗論己屬其門生曹欽程誣劾而以宗建爲首并及李應昇黃尊素忠賢遂矯詔削籍下撫按追贓明年以所司具獄緩遣緹騎逮治俄入之李實疏中下詔獄毒訊許顯純厲聲罵曰復能詈魏上公一丁不識乎竟坐納廷弼賄萬三千錠之獄宗建旣死徵贓益急其所親副使蔣英代之輸亦坐削籍忠賢敗詔贈宗建太僕寺卿官其一子福王

時追諡忠毅

明史舊志云沈義者吳江市人業賣饌為人任俠仗義方宗建被逮時僮僕無敢從者義獨

慨然隨侍周旋橐餽不避危險宗建死於獄惟義買棺親為含殮一時盛傳其事比於文文山之張義甫蘇松兵備馮元

颺奇其人檄至麾下崇禎末元颺巡撫天津題授都司加副總兵銜後隱居伏龍山而卒

王佐聖字克仲長洲人父騰程萬厯癸卯舉人為王敬臣入室

弟子佐至嚴州推官佐聖舉萬厯壬子鄉試授青浦教諭崇

禎十四年遷遵義知縣遵義萬厯間播平始入版圖地連水

西諸苗時出剽掠佐聖相險要於新站築城以遏寇衝招流

亡開邊屯未幾土苗吳上才郭士奇等擁眾焚掠大溪里殺

內附土官趙國政佐聖督民兵與戰生擒上才士奇奪還所

掠男婦三百餘口條上守禦十策請亟誅二賊以杜後患上

官不即從明年四月賊黨龍正吳尙賢率眾來攻鄉勇王

選王之琴冉國柱迎戰敗歿佐聖晝夜捍拒越四日賊飛梯

入城吳郭二賊越獄應之佐聖以印付子恪間道走仗劍坐

堂上手刃數賊遂被害時十里土司王尙明者先經佐聖訓

諫頗知忠義聞變舉白旗率兵追賊於新城盡殺之士民立

廟祀佐聖以選等三人為配

楊廷樞記參舊府志

張振德字季修崑山人福建副使情之孫由選貢生授四川興

文知縣縣故九溪巒地萬厯初始建土牆數尺戶不滿千永

寧宜撫奢崇明有異志潛結奸人掠賣子女振德捕奸人論

配之招還被掠者三百餘人崇明賄以二千金振德怒却之

裂其牘天啟元年方赴成都與鄉闈事而崇明部將樊龍殺巡撫徐可求副使路日升李繼周等重慶時振德兼署長寧去賊知縣段高選皆抗節死賊遂據重慶時振德兼署長寧去賊稍遠從者欲走長寧振德曰守與文正也疾趨入城長寧主簿徐大禮與振德善以騎來迎振德邵之督鄉兵與戰不敵退集居民城守會大風雨賊毀土城入振德命妻錢及二女持一劍坐後堂曰若輩死此吾死前堂乃取二印繫肘後北向拜曰臣奉職無狀不能殺賊惟一死明志妻女先伏劍死乃命家人舉火火熾自頸一門死者十二人賊至火所見振德面如生左手繫印右手握刀忿怒如赴敵狀皆駭愕羅拜

而去事聞賜祭葬贈光祿卿諡烈愍敕有司建祠世蔭錦衣

千戶

明史

蔡人龍字君伸吳縣人天啟壬戌武進士授潯梧守備碧灘潯水猖亂督府檄人龍會兵進勦諸將皆觀望人龍獨勇敢深入殺賊甚衆未幾賊不攻人龍外援不至力戰死子至中率死士入賊巢獲父屍擒劇賊歸剖其心以祭事聞贈遊擊將

軍

約康熙間吳縣志

蘇州府志卷第八十九

蘇州府志卷第九十

人物志目錄

忠節下

明

蔡懋德

杜松

蔣若來

徐汧

顧咸正

子天達

天達

顧咸受

瞿式耜

宋學朱

陳用極

楊廷樞

顧咸建

張孝起

馬乾

王佐才 陳大任

周室瑜

子朝鑛 三人

蘇達道等十

朱集璜

孫道民

張謙

陶炎

王熠慶

夏萬亨

孫祥生

龔元祥

子炳衡

包文達

石電

周大啟

莫世驊 詹世龍

陳于王

文震亨

魯之垠

韋志斌

吳易

父承緒

周瑞

劉曙

管定

沈自炳

弟自嗣

孫兆奎

父久貞 京 趙汝珪

從弟瓊 朱旦

華

王景亮

洪祖烈

胡甲桂

子泓

顧錫嘯

父天敘

蘇兆人

江用楫 顧宗堯

趙廕

王燾

顧繩貽

毛維張

許炎

徐嶧

曹遜

曹蕭

髯樵叟

盧渭

歸昭

文乘

項志寧

屈坦之 王道煥

祝舜齡

虎邱儒士

徐守質

馮知十

顧所受

殷獻臣

蘇州府志

沈璜

汝可起

顧維寰

張長瀾

許王家

劉古江

周鏡

吳鑑

潘爾彪 吳派遠 周耀始 沈璐

徐鑛 陳宗道

周邦彥

弟邦穆

趙牧

王奕昌

葉樹人

王上壽

族子良臣 族孫湜

沈龍含

弟致昶 致昂

徐允芳

周廷柱

本朝

尹明廷

從兄明徵

楊士祥

程廕桂

子烈

王翼孫

費增運

江瑤

瑤子朝棟 瑤從兄琅

施錦

錢邦彥

陸霖

蘇州府志卷第九十

人物

忠節下

明

蔡懋德字稚立崑山人少慕王守仁爲人著管見宗良知之說
舉萬曆四十一年進士授杭州推官天啓初行取入都同鄉
顧秉謙柄國懋德不與通秉謙怒以故不得顯擢授禮部儀
制主事進祠祭員外郎尙書率諸司往謁魏忠賢祠懋德託
疾不赴崇禎初出爲江西提學副使遷浙江右參政分守嘉
興湖州劇盜屠阿丑有衆千餘出沒太湖懋德曰此可計擒
也悉召瀕湖豪家簡壯士與同發遂擒阿丑內艱服除起并

徑兵備歲旱懋德禱卽雨他鄉爭迎以禱又輒雨調寧遠以
守松山及修臺堡功數敘資會災異求言懋德上省過治平
二疏規切君臣一時咸笑爲迂懋德好釋氏律身如苦行頭
陀楊嗣昌謂其清修弱質不宜處邊地改濟南道濟南新殘
破大吏多缺人懋德攝兩司及三道印遷山東按察使河南
右布政使田荒穀貴民苦催科賊復以先服不輸租相煽誘
懋德亟徵州縣停徵上疏自劾詔鑄七級視事十四年冬擢
右僉都御史巡撫山西召對賜酒饌銀幣明年春抵任討平
大盜王冕十月統兵入衛京師詔扼守龍泉固關二關季自
成已陷河南懋德禦之河上十六年冬自成破潼關據西安
盡有三秦十二月懋德師次平隄遣副將陳尙智扼守河津
山西京師右背蒲州北抵保德悉隣賊依黃河爲險然窮冬
冰合賊騎得長驅懋德連章告急請禁旅及保定宣府大同
兵疾赴河干合拒中朝益積憂山西言防河者甚衆然無兵
可援懋德以疲卒三千當百萬狂寇時太原洶洶晉王手教
趣懋德還省十八日懋德去平陽二十日賊抵河津自船窩
東渡尙智走還平陽二十二日賊攻平陽拔之尙智奔入泥
源山中二十八日懋德還太原明年正月自成稱王於西安
賊旣渡河轉掠河東列城皆陷於是山西巡按御史汪宗及
上言曰晉河二千里平陽居其半撫臣懋德不待春融冰泮

遠爾返旆賊卽於明日報渡臣言宜提一旅星馳而前張疑聲討尙冀桑榆之收無如不聽何賊日遣僞官匝月餘郡皆失是誰之過歟有詔奪官候勘以郭景昌代之二十三日尙智叛降於賊於是懋德誓師於太原布政使趙建極監司毛文炳藺剛中畢拱辰太原知府孫康周署陽曲事長史范志泰等官吏軍民咸在懋德哭衆皆哭罷官命適至或請出城候代懋德不可曰吾已辨一死矣景昌卽至吾亦與俱死調陽和兵三千協守東門剛中慮其內應移之南關之外遣部將張雄分守新南門召中軍副總兵應時盛入參謀議懋德等登城二月五日賊至城下遣部將牛勇朱孔訓王永魁出

戰死之明日自成具鹵簿督衆攻城陽和兵叛降賊又明日晝晦懋德草遺表須臾大風起拔不揚沙調張雄守大南門雄已縋城出降語其黨曰城東南角火器火藥皆在我下卽焚樓夜中火起風轉烈守者皆散賊登城懋德北面再拜出遺表付友人賈士璋間道達京師語人曰我學道有年已勘了死生今日吾致命時也卽自到麾下持之時盛請下城巷戰顧懋德曰上馬懋德上馬時盛持矛突殺賊數十人至炭市口賊騎充斥時盛呼日出西門懋德遽下馬曰我當死封疆諸君自去衆復擁懋德上馬至水西門懋德叱曰諸君欲陷人不忠耶復下馬據地坐時盛已出城殺妻子還顧不見

復斫門入語懋德曰請與公俱死遂偕至三立祠懋德就縊未絕時盛釋甲加其肩乃絕時盛取弓弦自經自懋德而下太原死事凡四十有六人賊皆尸之城上自成恨懋德之不降也驗其尸以刃斷頸而去福王時諡忠襄 本朝乾隆四十一年

純皇帝追諡明季殉國諸臣

賜懋德專諡忠恪

明史參殉節錄

瞿式耜字起田常熟人禮部侍郎景淳孫湖廣參議汝說子也舉萬曆四十四年進士授吉安永豐知縣有惠政調江陵永豐民乞留命再任以憂歸崇禎元年擢戶科給事中疏言李國楷宜留內閣王永光宜典銓曹于汧宜秉憲鄭三俊畢懋

良宜總版曹李邦華宜主六政帝多採其言俄陳朝政不平爲王之案請恤孫慎行訟冤速楊錦王化貞之誅白楊漣左光斗結毒之謗追論故相魏廣微顧秉謙馮銓黃立極之罪因言奪恂建祠之朱童蒙不可寬積愆久廢之湯賓尹不可用帝亦納之又極論來宗道楊景辰附逆不可居政府二人旋罷去御史袁宏勛劾大學士劉鴻訓逆黨徐大化實主之川貴總督張鶴鳴先已被廢其復用由魏忠賢式耜並疏論已頌楊漣魏大中周順昌爲清中之清忠中之忠三人遂賜諡未幾陳時務七事言起廢不可不覈陞遷不可不漸會推不可不慎諡典宜嚴刑章宜飭論人宜審附璫者宜區分又

極論館選奔競之弊請臨軒親試事多議行時將定逆案請
盡發紅本定其情罪輕重又言宣府巡撫徐良彥不附逆奄
爲崔呈秀誣劾遣戍亟當登用彥良遂獲起式耜矯矯立名
所建白多當帝意然搏擊權豪大臣多畏其口十月詔會推
閣臣禮部侍郎錢謙益以同官周延儒方言事蒙眷慮並推
則已紬謀沮之式耜謙益門人也言於當事者擯延儒弗推
而列謙益第二溫體仁遂發難延儒助之謙益奪官閑住式
耜坐貶謫式耜嘗頌貴寧參政胡平表殺賊功請優擢其後
平表爲貴州布政使坐不謹罷式耜再貶二秩遂廢於家久
之常熟奸民張漢儒希體仁旨訂式耜貪肆不法體仁主之

下法司逮治巡撫張國維巡按路振飛交章白其冤不聽比
就獄則體仁已去位獄解歸十七年福王立於南京八月起
式耜應天府丞未幾擢右僉都御史巡撫廣西明年夏甫抵
梧州聞南京破靖江王亨嘉謀譖號召式耜拒不往亨嘉至
梧劫式耜幽之桂林遣人取其敕印初式耜議立桂端王子
安仁王及唐王監國式耜以爲倫序不當立不奉表勸進至
是爲亨嘉所幽及遣使賀王因乞援王喜而亨嘉爲丁魁楚
所攻勢窘乃釋式耜式耜與中軍官焦璉召思恩參將陳邦
傳共執亨嘉亂遂定唐王擢式耜兵部右侍郎協理戎政式
耜不入朝退居廣東順治三年九月大兵破汀州式耜與

魁楚等議立永明王由榔乃迎王梧州以十月十日監國肇慶進式耜吏部右侍郎東閣大學士兼掌兵部事未幾贛州敗報至司禮王坤迫王赴梧州式耜力爭不得十一月朔蘇觀生立唐王聿錡於廣州式耜乃與魁楚等定議迎王還肇慶遣總督林佳鼎禦觀生兵敗歿式耜視師峽口十二月望大兵破廣州王坤趣王西走式耜趨赴王王已越梧而西四年正月大兵破肇慶逼梧州丁魁楚呂大器王化澄皆棄王去止式耜及吳柄吳貞毓等從乃由平樂抵桂林二月大兵襲平樂分兵趨桂林王將走全州式耜極陳桂林形勢請留不許自請留守許之進文淵閣大學士兼兵部尚書

賜劍便宜從事平樂潯州相繼破桂林危甚總督朱盛濃巡按辜廷泰布政使朱盛澗副使_○垂雲桂林知府王惠卿以下皆遁惟式耜與通判鄭國藩縣丞李世榮及都司林應昌李當瑞沈煌在焉大兵於三月薄桂林以騎數十突入文昌門登城樓瞰式耜公署式耜急令援將焦璉拒戰凡三月式耜身立矢石與士卒同甘苦積雨城壞吏士無人色式耜篤城守自如故人無叛志援兵索餉而譁式耜括庫不足妻邵捐簪珥佐之既而璉兵主客不和譟而去城幾破者數矣會陳邦彥等攻廣州大兵引而東桂林獲全璉亦復陽朔及平樂陳邦傳亦由潯復梧州王聞捷封式耜臨桂伯璉新

與伯式耜初請王返全州不聽已請還桂林王已許之會武岡破王由靖州走柳州式耜復請還桂林十一月大兵自湖南逼全州式耜偕何騰蛟拒却已梧州復破王方在象州欲走南寧以大臣力爭乃以十二月還桂林五年二月南安侯郝永忠駐桂林惡城外團練兵盡破水東十二村殺戮無算與式耜構難式耜力調劑永忠乃駐興安大兵前驅至靈川永忠戰敗入桂林請王卽夕西走式耜力爭不聽左右皆請速駕式耜又爭王曰卿不過欲予死社稷耳式耜爲泣下沾衣王甫行永忠卽大掠誣殺太常卿黃太元式耜家亦被掠家人矯騰蛟令箭出城日中趙印選諸營自靈川至

亦大掠城內外如洗永忠走柳州印選等走永寧明日式耜息城中餘燼安撫遠近焦璉及諸鎮周金湯兆佐胡一清等各率所部至騰蛟軍亦至三月大兵知桂林有變來襲抵北門騰蛟督諸將拒戰城獲全時王駐南寧式耜遣使慰三宮起居王始知式耜無恙爲泣下閏三月廣東李成棟江西金聲桓皆叛我大清據地歸式耜請王還桂林王從成棟請將赴廣州式耜慮成棟挾王自專力爭之乃駐肇慶十一月永州寶慶衡州並復式耜以機會可乘請王還桂林圖出楚之計不納式耜身在外政有關必疏諫嘗曰臣與王上患難相隨休戚與其不同他臣一切大政自得與聞王爲褒納

而是時成棟子元允專朝政知敬式耜袁彭年丁時魁金堡等遂爭相依附六年正月時魁等逐朱天麟不欲何吾騶爲首輔召式耜入直以文淵印畀之式耜終不入也未幾騰蛟聲桓成棟相繼敗沒國勢大危朝士方植黨相角式耜不能禁七年正月南雄破王懼走梧州諸大臣訐時魁等下獄式耜七疏論救胡執恭之擅封孫可望也式耜疏請斬之皆不納九月全州破開國公趙印選居桂林衛國公胡一清守榕江與寧遠伯王永祚皆懼不出兵 大兵遂入嚴關十月一清永祚入桂林分餉榕江無兵 大兵益深入十一月五日式耜檄印選出不肯行再趣之則盡室逃一清及武陵侯

楊國棟綏寧伯蒲纓寧武伯馬養麟亦逃去永祚迎降城中無一兵式耜端坐府中家人亦散部將戚良勛請式耜上馬速走式耜堅不聽叱退之俄總督張同敞至誓偕死乃相對飲酒一老兵侍召中軍徐高付以敕印屬馳送王是夕兩人秉燭危坐黎明數騎至式耜曰吾兩人待死久矣遂與偕行至則踞坐於地諭之降不聽幽於民舍兩人日賦詩倡和得百餘首至閏十一月十有七日將就刑天大雷電空中震擊者三遠近稱異遂與同敞同死王聞贈式耜粵國公諡文忠

本朝乾隆四十一年

賜式耜專諡忠宣

明史參忠烈紀實勝朝殉

節諸臣錄

杜松字來清崑山人右都督桐之弟

桐傳見武功志有膽智奮勇敢戰

武健絕倫由舍人從軍累功爲寧夏守備萬曆二十二年卜失克掠張春井大入下馬關松偕遊擊史見李經以二千餘騎邀擊馬蓮井小勝誤入伏中見戰死松經皆重傷士卒死過半麻貴援軍至松復裹創力戰寇始敗走時松已進遊擊將軍論功遷延綏參將貴大舉搗巢松以右軍出清平塞多所斬獲進副總兵尋以本官改寧夏東路松爲將廉尙氣不能容物常以小忿薙髮爲僧部議聽其歸尋起孤山副總兵三十三年擢署都督僉事代李如樟鎮延綏明年套寇犯安邊懷遠松大破之改鎮蘇州三十六年夏代李成梁鎮遼東

十二月敗敵連山驛賴暈以者不顏長昂子也狡黠爲邊患與從父蟒金潛入薊鎮河流口大掠去復結黃台吉謀犯喜峯口松受^總督王象乾指潛搗黃台吉帳以牽薊寇乃從寧遠中左所夜馳至哈流虎掩殺拱兔部落百四十餘級以大捷聞邀重賞副使馬拯謂拱兔內屬不當勦彼且復讐與松相訐松忿邀賞愈急詔予之拱兔果以無罪見勦怒小歹青又數激之乃以五千騎攻陷大勝堡執守將耿尙仁支解之深入小凌河肆焚掠遊擊於守志遇於山口大敗死千餘人守志亦重創松駐大凌河不敢救遼人多咎松朝議謂松前僅抵錦州邊十里未嘗出塞所殺乃保塞部落悉縛殺之非

陣斬松愈忿言撫案諸臣附會馬拯害其奇功自提兵出塞將搗巢以雪前恥而所得止五級士馬多陷大凌河松益慙憤數欲自經盡焚其鎧甲器仗置一切疆事弗問兵部以聞乃勒松歸里而以王威代之松既廢時多惜其勇然惡其憤事無推轂之者至四十三年河套寇大入令松以輕騎搗火落赤營獲首功二百有奇復叙用逾二年薊遼多事特設總兵官鎮山海關以松任之四十六年張承蔭戰沒詔松馳援遼陽明年二月楊鎬議四路出師以撫順最衝令松以六萬兵當之故總兵趙夢麟保定總兵王宣爲佐期三月二日抵二道關會李如栢等並進松重而無謀剛復使氣二十九日

夜出撫順關日馳百餘里抵渾河半渡河流急不能盡渡松醉趣之將士多溺河中松遂以前鋒進連克二小砦松喜三月朔乘勢趨撒爾湖谷口時我大清方築城界凡山上役夫萬五千以精騎四百護之聞松軍至精騎則盡伏谷口以待松軍過將半伏兵尾擊之追至界凡渡口與築城夫合據山旁吉林崖明日松引大軍圍崖別遣將營撒爾湖山上松軍攻崖方戰我大清益千人助之已又續遣二旗兵趨界凡以爲援而遣六旗兵攻松別將於撒爾湖山明日六旗兵大戰破撒爾湖山軍死者相枕藉所遣助吉林崖者自山馳下擊松軍二旗兵亦直前夾擊松兵大敗松與夢麟宣皆歿

於陣橫尸亘山野流血成渠我 大清兵逐北二十里至勺

琴山而還時軍營五百尙阻渾河而松已敗頃之馬林劉綎

兩軍亦敗獨李如栢一軍遁還時萬厯四十六年也事聞朝

議多咎松輕進天啟初贈少保左都督世蔭千戶立祠賜祭

乾隆四十一年通諡忠烈

明史參
殉節錄

宋學朱字用晦長洲人崇禎四年進士授南京工部主事管錢

局著司鑄政畧丁憂起補禮部以才望改御史嘗抗疏劾楊

嗣昌田維嘉時論壯之出按山東十一年冬我 大清兵自

畿輔南下楊嗣昌檄山東巡撫顏繼祖移師德州濟南空虛

學朱方行部章邱聞警馳還與布政使張秉文副使周之訓

翁鴻業參議鄧謙鹽運使唐世隆等議守城連章告急於朝

無應者我 大清兵徇下州縣遂臨濟南學朱等分門死守

晝夜不解日 援兵不至明年正月二日 大兵從西北登學

朱率士卒救之中又被執懸於城樓殺之須臾縱火焚樓骸

骨俱燼秉文等皆死焉秉文等贈卹如制而嗣昌宿怨學朱

以不得屍爲難獨格不予福王時贈大理卿乾隆四十一年

通諡忠烈

明史參忠烈紀
實及殉節錄

蔣若來字龍江長洲人世居婁門身材短小獨骨臂善騎射家

貧流落巡撫張國維異其才拔自行伍以把總守江浦流賊

薄城蟻附而上若來提刀截殺應手而斃方坐城樓下俄見

賊金冠紫袍者握大石直前擊中若來面仆他賊乘勢合圍

而前若來奮躍登城射殪其酋復發大礮擊殺三千人以功

擢遊擊守江浦六安宿松之役無援敗績事見陳于王傳累遷浙江

總兵後與朱大典守金華城陷令長子出已集妻妾子女於

廳縱火焚之提刀巷戰殺四十餘人自刎死乾隆四十一年

通諡忠烈明史參殉節錄及鄭敷教撰傳

陳用極字明仲崑山人少以氣節自矜中年折節讀書為諸生

南都建以代舉授工部司務加職方主事從侍郎左懋第通

好 本朝遣歸至滄州復飛騎追還幕中士多引去用極曰

見危避難非夫也遂同館太醫院順治二年閏六月十九日

執見攝政王懋第用極俱不屈與遊擊王一斌都司張良佐

劉統王廷佐俱見殺門人山陽咸默與故人子同邑徐元敷

潛收用極屍焚之負骨歸作北使殉節實錄乾隆四十一年

賜用極通諡忠節舊志參殉節錄

徐汧字九一長洲人生未期而孤稍長砥行有時名天啟五年

魏大中被逮過蘇州汧貸金資其行周順昌被逮緹騎橫索

錢汧與同里楊廷樞斂財經理之崇禎元年成進士改庶吉

士授檢討中允黃道周以救錢龍錫貶官倪元璐道周同年

生請以己代謫帝不允汧上疏頌道周元璐賢且自請罷黜

帝詰責汧汧曰推賢讓能蓋臣所務難進易退儒者之風間

者陛下委任之意希注外廷防察之權輒逮闕寺默窺聖意
疑貳漸萌萬一士風日賤宸嚮日移明盛之時爲憂方大帝
不聽汧尋乞假歸還朝遷右庶子充日講官十四年奉使益
王府便道還家當是時復社諸生氣甚盛汧與廷樞顧杲華
允誠等往復九契居久之京師陷福王召爲少詹事汧以國
破君亡臣子不當叨位且痛宗社之喪亡由朋黨相傾移書
當事勸以力破異同之見旣就職陳時政七事惓惓以化恩
讐去偏黨爲言而安遠侯柳祚昌疏攻汧謂朝服謁璐王於
京口自恃東林巨魁與復社場廷樞顧杲諸奸狼狽相倚陛
下定鼎金陵彼爲討金陵檄所云中原逐鹿南國指馬是何

語乞置汧於理除廷樞杲公其餘徒黨容臣次第糾彈時國
事方棘事亦竟寢汧移疾歸明年南京失守蘇常相繼下汧
慨然太息作書戒二子投虎邱新塘橋下死郡人赴哭者數

千人魯王監國贈汧太子太保禮部尙書諡文靖乾隆四十

一年通諡忠節

明史參殉節
錄及姜垓傳

楊廷樞字維斗吳縣人孝子大滌子舉崇禎庚午鄉試第一自
爲諸生卽以文章氣節負重名倡應社於吳中與太倉張溥
張采等諸名流分經立課集漢唐以下諸儒義疏傳說辨其
源流得失爲文章必傳經義力矯世俗詭譎之習四方學者
奉爲楷模因其所居臯里稱臯里先生領解後聲譽益盛門

弟子著錄者一千人初周順昌被逮廷樞身左右之幾被禍甲申聞變北向慟哭誓以死殉福王立貽書執政所言十事皆天下大計奄黨阮大鍼者崇禎時廢居金陵復社士爲南都防亂揭討之大鍼遣使求解於廷樞廷樞拒不納至是大鍼方得志欲修宿怨御史王實鼎阿大鍼意上復社渠魁疏專指廷樞將構大獄會南都破事得解乙酉後隱居鄧尉山不復入城市順治丁亥四月蘇松提督吳勝兆反爲之運籌者戴之僑廷樞門人也事敗連廷樞被執於舟中賦絕命詞十一首裂衣幅作遺書自題其後曰吾自少讀書慕文信國之爲人今日之事乃其志也五月朔巡撫土國寶會鞠於蘆

墟泗州寺以好言相慰命其髮廷樞不屈乃殺之時年五十三其門人吳江進紹原斂其尸葬之私諡忠文先生乾隆四

十一年通諭

舊志參
殉節錄

顧咸正字端本崑山人大學士鼎臣曾孫崇禎六年舉人十三年以會試副榜除延安府推官延安爲流賊所自起連年大旱民多死或爲盜咸正招流民開荒地田之無主者立爲官莊出私錢募人種之其年兩大熟明年益墾田至二萬畝又教民引水鑿池穿井作恒升車及捕蝗諸法奉檄督兵追賊朱明才等三百餘人至直羅盡殲之招降猢猻張成儒丁世蕃慶陽土賊潘自安等治績甚著流賊陷西安郡兵皆散賊

執咸正欲降之不屈拘之營中賊敗南歸會雲間事起錄其

黨姓名首及咸正乃與同事四十餘人事具長洲劉曙傳並死子天

達字大鴻貢生天遴字仲熊諸生以藏陳子龍故俱死歸莊傳

乾隆四十一年通諡節愍殉節錄

顧咸建字漢石咸正弟崇禎十六年進士授錢塘知縣甫之官

聞京師陷人情洶洶咸建戢奸宄嚴警備巡按御史彭遇颯

以貪殘激變賴咸建調護事寧而民免株連及南都失守鎮

江守將鄭彩等率眾還閩緣道劫掠咸建出私財迎犒乃斂

威去無何馬士英擁兵至頃之大將方國安兵亦至咸建謀

於上官先期遣使行賂兵力不入城四鄉多被淫掠城中得

無擾時監司及郡縣長吏悉遁竄咸建散遣妻子獨守官不

去潞王既降咸建不至尋被執死之乾隆四十一年通諡忠

節明史 逸史云 一兵既至巡撫張秉貞恇擾不知所為

總兵陳洪韋之納款咸建爭之不能得秉貞遂挾路王

出降咸建棄官去大帥遣騎追及於吳江執送杭州抗詞不

屈閩六月朔殺於清忠坊士民徒跣號泣懸首城樓一蠅不

集閩中贈太僕少卿諡忠節顧咸受字幼疏亦咸正弟天啟甲子舉人乙酉城破死於兵乾

隆四十一年奉 旨入祠

張孝起字將子吳江人舉人基曾孫崇禎三年舉於鄉十六年

授廉州推官 大兵至孝起避海濱舉兵謀恢復戰敗被獲

妻妾俱投海死孝起羈軍中會李成棟叛歸永明王孝起亦

脫去至肇慶工以爲吏科給事中時朝政決於成棟子元允而袁彭年丁時魁金堡蒙正發劉湘客附之人目爲五虎皆專橫無人臣禮孝起清真介正與大學士朱天麟等同心匡正不能勝庚寅王赴梧州時魁等失元允援以罪去王以孝起代時魁掌吏科印久之擢右僉都御史巡撫高雷廉瓊四府城破走避龍門島島破被執不食七日死乾隆四十一年

通諡忠節

明史本傳參同時各傳及殉節錄

馬乾吳縣人爲川東兵備僉事擊走獻賊將劉廷舉復重慶固守永明王擢右副都御史巡撫四川 大兵下重慶乾戰敗死乾隆四十一年通諡忠節

殉節錄

王佐才字南陽崑山人嘗官狼山副總兵年老家居 大兵下江南崑山鄉紳朱天麟倡議拒守時縣丞閻茂才已遣使迎降用爲知縣縣人共執茂才殺之迎故令楊永言主縣事貢生陳大任議迎佐才爲帥虛所居爲帥府身自被甲署行伍諸生朱集璜陶炎及故儀封令周室瑜等共舉兵助之參將陳宏勛率壯士百人至以爲右帥 大兵至宏勛率舟師迎戰敗還遊擊孫志尹戰沒佐才登城死守七月六日大雨城陷天麟狼狽走福建永言亦遁去佐才縱民出走而已冠帶坐帥府被殺乾隆四十一年通諡烈愍大任時已出城語從者曰同起事而我獨免非夫也復入死之妻張氏子思翰皆

死乾隆四十年奉

旨入祠

明史參
殉節錄

周室瑜字服堅崑山人天啟丁卯舉人授儀封知縣罷歸為人
 有膽力起兵守東門與子朝鑛執戈司餉城破率家人操刃
 以待兵入輒殲之朝鑛亦奮劍斫傷數人既而鐵騎四圍登
 屋發矢如雨父子同遇害乾隆四十一年通諡節愍室瑜妻
 諸氏被執不屈死朝鑛妻王氏自縊其他守城死者蘇達道
 莊萬程陸世鏗闕死者陸雲將歸之甲周復培不屈死者陸
 彥冲代公死者沈復憲朱國軾救母死者徐沼自盡者徐澂
 王在中吳行貞乾隆四十一年並奉

旨入祠

明史參忠
烈紀實及

殉節
錄

朱集璜字以發崑山貢生學行為鄉里所推教授弟子至數百
 人留心世務先是嘉定崇明二縣不轉漕崇禎中以軍興乏
 餉令崑山太倉長洲吳縣代輸而二邑償其直崑山輸粟萬
 二千餘石直不能盡償民大困集璜致書同郡縉紳曰邑中
 利害有大於是者乎夫二邑之不轉漕非倖也已輸直於正
 稅矣今以額外增之民安得不病白其事上官除四州縣之
 累而二邑卒亦不轉漕邑東南有夏駕河又南為雞鳴塘並
 承太湖吳淞之委海潮擁沙漸為平陸邑往往病水集璜相
 度地形徐議開濬之法於邑令楊永言親為庀材督役復水
 故道凡六閱月而工竣民大利之崑山起兵助王佐才城守

城潰書絕命詞投東禪寺後河死學者私諡節孝先生所著
有觀復堂集二十卷門人孫道民張謙同日死乾隆四十
一年並奉 旨入祠 舊志參
殉節錄

陶炎字圭穉崑山人以邑諸生師事同里蔡懋德與朱集璜友
善相礪實學炎世居雞鳴塘去城二十餘里 大兵臨城炎
方率鄉勇三百餘人赴援未至聞城陷乃還歎曰以發其死
矣夜自縊其子藁葬於祖墓之側越數日集璜柩至以兵梗
不得葬亦瘞於此之右時人爲之語曰朱斷斷陶植植生同
學死同穴乾隆四十一年奉 旨入祠 舊志參
殉節錄

王熠慶字鳳翔崑山人天性孝友好施德於鄉里乙酉嬰城戰
里人推爲陣長力鬪死妻張自沈山塘涇大倉陳瑚誌其墓

曰義士 舊志

夏萬亨字元禮崑山人萬曆戊午舉人由婺源教諭陞西平知
縣時河南郡邑所在被寇萬亨修備甚嚴居三年改知夏邑
夏邑地小民疲不可以用兵賊嘗頓兵城下萬亨開門解諭
之而去劉超叛於永城督師丁啟睿率河南軍討之諸道援
者且數萬軍資器械不缺於供萬亨力也福王立迎太后於
河南擢江西布政使言者以爲驟改僉事分巡南昌瑞州保
寧王避寇南昌其舍人豪橫萬亨執而笞之府中人皆持白
挺作難百姓起鬪將焚王府萬亨諭之始定尋陞按察使署

布政使事南都潰萬亨奉其母至撫州屬於門生聞南昌失守乃入建昌奉益王監國建昌破萬亨被執妻顧子婦陸孫祥生一孫女先赴水死僕婢死者復十餘人大帥金聲桓欲降之萬亨書絕命詞見志械至武昌與副使王養正知府王棫推官劉允浩史夏隆等俱死傳首江西棄屍城下武昌人收葬之於沌砦河乾隆四十一年通諡烈愍

明史忠烈紀實參殉節錄

龔元祥字子禎長洲人萬曆四十三年舉於鄉崇禎四年爲霍山教諭屬屢附以名教自任與訓導姚允恭友善八年賊陷鳳陽元祥偕縣令守禦賊掩至令逸去元祥督士民固守或勸之避元祥曰食祿而避難不忠臨危而棄城不義吾平日

講說者謂何倘不測死爾及賊陷城元祥整衣冠危坐賊至侃侃諭以大義賊欲屈之厲聲曰死卽死賊輩何敢辱我賊怒執之去罵不絕口遂遇害子炳衡號呼罵賊賊又殺之閱五日允恭斂其屍遂自縊適令至解免越日賊復入允恭卒死之事聞贈元祥國子助教建祠曰忠孝以其子配乾隆四

十一年通諡烈愍

明史參殉節錄

包文達字行甫蘇州人世襲蘇州衛指揮同知崇禎八年正月賊攻桐城巡撫張國維檄之從征別其所知曰父死未葬念之心痛今已矣及至而桐城圍解賊已移師至潛山太湖國維乃發守備告士允趨潛山文達及把總張其威守備項鼎

鏞趨太湖二日十二日遇賊於宿松五里鋪人馬飢疲將暴

而獲賊哨諱然分其囊金以為賊星散易襲爭出迹之文達

止之不得已而賊伏四起士卒皆竄文達中流矢墮馬強起

揮戈再戰為賊斷臂斫頭而死乾隆四十一年通諡烈愍

紀實參殉節錄附錄舊志石電者常熟巧戶也長身赤髯

能挽強超距尤精槍法包文達往援時電與壯士陳英從二

月十二日追賊於宿松我師恃勇輕進陷賊伏中文達死之

電英分左右翼搏戰殺賊無算英躡被擒電大呼往救賊圍

之數重電力盡捨槍手弓射殺數人賊羣斫之頭既斷猶

僵立為擊刺狀良久乃仆皖人招其魂祀之余忠宣廟下

莫是驥詹世龍蘇州俱官守備崇禎十年禦賊宿松皆力戰

死乾隆四十一年通諡烈愍

明史不言何處人此據殉節錄

陳于王字丹衷吳縣人世為蘇州衛千戶既襲職兩舉武鄉試

授奇兵營守備以捕獲海盜功遷都司僉書守崇明蛇山盜

王一爵等亂海濱于王率戰艦數十擊之羊山持刀躍入其

舟生擒一爵載其黨死盡上官交薦遂知名天啟初經畧熊

廷弼用為標下參將代者至飲于王酒暴卒其子訴于王毒

殺之逮繫久不釋崇禎二年京師有警巡撫曹文衡賞其罪

署前鋒遊擊將兵勤王既至兵事已解遂南還久之巡撫張

國維用為中軍守備九年賊入江北圍廬州陷和州國維遣

于王守六合守備蔣若來守江浦賊方圍江浦若來急入與

知縣李維樾固守賊登城若來拒却之六合無城若來與于

王犄角捍賊二邑賴以全賊犯宿松于王弟國計偕指揮包

文達等以二千人往救文達戰破于王驟馬入拔其弟而出十年正月賊犯江浦六合及安慶國維遣部將張載賡等援安慶而以新募兵二千令副將程龍及于王若來分戍二邑已而賊不至國維議赴安慶城太湖乃提龍等三將兵西上三月賊犯太湖副將潘可大將安慶兵九百龍等三將將吳中兵三千六百禦之酆家店賊先犯可大營龍等至夾擊之賊多死夜復至中伏亦敗去監軍史可法欲退扼要害諸將不從掘塹守二十四日羅汝才劉國能等七營數萬衆齊至圍數重諸將突擊頗有殺傷可法偕副將許自強馳救扼於賊鳴大礮遙爲聲援諸將亦呼噪突圍會天雨甲重不得出

明日日中賊四面入將士短兵接戰可大戰死龍引火自焚死于王手執大刀左右殺賊傷重力竭北面叩頭自刎死閱十日面色如生若牙服圍人衣以免事聞贈于王昭勇將軍

指揮使世蔭副千戶乾隆四十一年通諡烈愍

明史參
殉節錄

周大啟字開美長洲人崇禎甲戌進士歷知黃州府事流寇屠掠全楚黃州城已毀大啟至召民築版匝月城完遷督學道抵辰州賊至率土司及吏民逆於桃源賊不敢犯甲申聞變望闕再拜不食死士民哀慟藁葬於辰州永順司之小乾溪

立祠祀之乾隆四十一年通諡節愍

江南通志
參殉節錄

魯之璵字瑟若蘇州人世襲蘇州衛百戶累官劉河參將南都

建號坊禦京口遷副總兵駐師福山 大兵至蘇州鄉兵四起諸生陸世鑰聚眾千餘屯陳湖中有十將官者亦屯千餘人於左近已而所部有被獲下獄者陳湖之師伏力士劫之焚城樓城中士民應之焚撫按公署撫按亦斂兵於南園之輿二千入城與 大兵戰眾潰不能支之輿鬪死有義士韋志斌者亦同死乾隆四十一年通諡節愍 忠烈紀實 參殉節錄

文震亨字啟美吳縣人大學士震孟之弟能詩善書畫由貢生官中書舍人國亡後寓陽城憂憤發病死或曰絕粒死乾隆四十一年通諡節愍 舊志參 殉節錄

劉曙字公旦長洲人崇禎癸未進士授南昌知縣未赴南都失

守歸隱蠡口居父喪時哀憤賦詩未嘗一至城市丁亥上海諸生欽浩通欵舟山疏吳中忠義士二十三人以曙為首曙實不識欵也其書為游騎所獲巡撫土國寶密令知府吳崇宗掩捕曙從容就縛口授絕命詞別母既見國寶不屈械送金陵下獄八旬與崑山顧咸正松江夏完淳縱橫詩酒談說忠義為樂二子蕃蓀亦逮至繫上元獄手書問母起居最二子以砥礪名節九月十九日赴市連呼高皇帝而死乾隆四十一年通諡節愍初曙以父病篤割左股痕三寸許至是其僕覓尸視股痕為驗云又同邑諸生管定字子靜工部郎中玉音猶子也少年負才亦以名在錄中被執與曙同日死 舊志

參殉節錄

吳易字日生吳江人邦楨孫生有膂力好兵法跡弛不羈崇禎十六年成泮士福王時謁史可法於揚州可法異其才薦授職方主事監紀軍前甚著勞績明年奉檄督餉吳中未還而揚州失已而吳江亦失遂與同邑孫兆奎沈自炳自駟等號召舟師聚眾數千人屯長白蕩出沒旁近諸縣道路為梗唐王聞之授兵部右侍郎兼右僉都御史總督江南諸軍事楊文驄奏易斬獲多進為兵部尚書魯王亦授易兵部侍郎封長興伯忠烈紀實及松陵縣志諸書皆作東浙授易兵部尚書封長興伯閩亦授兵部侍郎兼副都御史忠義伯在丙戌春復起兵八月二十四日出戰塘口獲舟二十明日之後此從明史

大雨不設備為總兵吳勝兆所敗易子身走父承緒妻沈及女皆投水死一軍盡殲明年春易鄉人周瑞復聚眾長白蕩迎易入其營巡撫二國寶遣副將汪某討之八百人皆為所殺軍聲頗振八月易至嘉善與倪曼青合營集飲孫璋家

大兵猝至易被獲殺於杭州草橋門乾隆四十一年通諡節愍瑞被獲死之乾隆四十一年奉旨入祠明史參忠烈紀實殉節錄

松陵文獻易死時年三十五無子妾阿香同時被掠以死自守諸帥皆敬禮之後得釋歸老於柳胥故里

孫兆奎字君昌吳江人祖履恒習兵家言兆奎能世其學崇禎丙子與吳易同舉於鄉相得甚歡已遂同起兵長白蕩及兵敗父久貞歿於軍兆奎先沈妻褚及女於湖而後自溺既溺

氣未絕為 六兵所執至蘇州巡撫土國寶欲降之不屈械
 至江寧殺之臨刑賦詩顏色不變兆奎從弟瓊字君瑜亦被
 執死湖州獄中同時死事者有沈自炳沈自駒華京趙汝珪
 朱旦續名賢紀旦即鷺之孫也等自炳自駒見後傳京字壯輿吳縣諸生
 兵敗時先驅妻子入水格殺數人他卒繼至手與搏戰相持
 溺死汝珪字子玉旦字爾赤皆戰死乾隆四十一年並奉

旨入祠

明史參忠烈紀實松陵文獻及殉節錄

沈自炳字君晦吳江人副使琬子博學工文詞在復社號為眉
 目福王立南都詔求人才自炳獻賦闕下以恩貢授中書舍
 人往揚州與弟自駒同參史可法幕歸與吳易同起兵及敗

赴水死弟自駒字君牧邑諸生性跌宕所交皆奇杰士其在
 史可法幕見可法躬細務遇人媼謂非勘亂才去而歸里
 既同吳易起兵以易不謹斥堠日置酒高會數諫不聽仰天
 號慟兵潰亦赴水死乾隆四十一年並奉 旨入祠舊府志參

吳江新志及殉節錄

王景亮字武侯吳江人初名佩字仙聲有至性刻苦嚮學崇禎
 末登進士仕福王為中書舍人主雲南試道梗不能進遂至
 閩中唐王擢為御史極言時事甚被恩禮旋加太僕卿巡按
 金衢兼督學政丙戌八月衢州破自縊死乾隆四十一年通

諡節愍

明史參松陵文獻及殉節錄

人物

忠節下

二

洪祖烈字定遠吳江人萬曆丙辰武進士累遷至南京水營游擊福王立擢都督僉書祖烈能詩文氣岸雄偉有節操歷官三十年囊橐蕭然乙酉六月武塘進士錢棟起兵推祖烈主其事兵潰棟死祖烈走入閩丙戌秋與御史鄭為虹守仙霞嶺軍沒死於浦城乾隆四十一年通諡節愍

蘇州先輩小傳參殉國錄

胡甲桂字秋卿崑山人崇禎十二年以鄉試副榜貢入國學授南昌通判遷永州同知以道梗改廣信至則南昌袁州吉安俱失廣信止疲卒士民多竄徒會黃道周以募兵至相與議城守已而道周敗沒勢益孤甲桂效死不去城破被執諭降不從幽別室自經死乾隆四十一年通諡節愍子泓在

家先死於難

明史參江南通志殉節錄

顧錫疇字九疇崑山人父天叙字禮初萬曆戊子鄉薦選鉛山知縣時礦使方張羣盜假其威縱暴山谷天叙擒四十餘人寘之法憂歸服闋補元城縣縣與河南接壤為潞藩舟楫取道私鹽窟穴天叙嚴立禁防積弊遂絕魏地多大剝其僧習為不法郡守欲盡逐之僧大譁天叙曰逐之不若安之立保甲連坐法使與編戶等僧遂不敢為奸調嘉魚縣以子錫疇貴棄官歸屏居二十年及兩都淪亡憤悶欲絕趣子南行錫疇不忍舍曰吾自盡吾當盡之節汝自為汝當為之事遂絕粒死年八十一錫疇年十三以諸生試南京魏國公以女女

之第萬厯四十七年進士改庶吉士授檢討天啟四年魏忠賢勢大熾錫疇偕給事中董承業典試福建程策大有譏刺忠賢黨遂指爲東林兩人並降調己更削籍崇禎初召復故官厯遷國子祭酒疏請復積分法禮官格不行錫疇復申言之且請擇監生爲州縣長已請正從祀位次進士爲國子博士者得與考選帝並允行省親歸乞在籍終養母服除起少詹事進詹事拜禮部左侍郎署部事帝嘗召對問理財用人錫疇退列陳用人五夫曰銓叙無法文網太峻議論太多資格太拘鼓舞未至請先令用人之地一清其源精心鑑別隨才器使一善也赦小過而不終廢棄一善也省議論而專責

成二善也拔異才而不拘常格四善也急獎勵而寬督責五善也末極陳耗財之弊仍歸本於用人帝善其奏楊嗣昌疏請撫流寇有樂天者保天下及善戰服上刑語錫疇抗言此諸侯交隣事稱引不倫與嗣昌大忤嗣昌秉政諸詞臣多攻之嗣昌頗疑錫疇會駙馬都尉王昺有罪錫疇擬輕典嗣昌搆之遂削其籍十五年廷臣交薦起爲南京禮部左侍郎福王立進本部尙書時尊福恭王爲恭皇帝將議廟祀錫疇請別立專廟俄請補建文帝廟諡景皇帝廟號及建文朝忠臣贈諡並從之溫體仁之卒也特諡文忠而文震孟羅喻義姚希孟呂維祺皆不獲諡錫疇言體仁得君行政最專且久其

負先帝罪大且深乞將文忠之諡或削或改而補震孟諸臣
 庶天下有所勸懲報可遂諡諸人削體仁諡吏部尚書張慎
 言去位代者徐石麟未至命錫疇攝之時馬士英當國錫疇
 雅不與合給事中章正宸熊汝霖劾之遂乞祭南海去明年
 春御史張孫振力頌體仁功請復故諡遂勒錫疇致仕南都
 失守錫疇鄉邑亦破時方遭父喪間關赴閩唐王命以故官
 督師力辭不拜寓居温州江心寺總兵賀君堯撻辱諸生錫
 疇將論劾君堯夜使人殺之投屍於江温人覓之三日乃得

棺殮乾隆四十一年通諡節愍

明史參縣志殉節錄

蘇兆人字寅侯吳江人

舊志云蘇州人今據縣志

工詩乙丙間在閩撫張肯

堂幕府肯堂由鷺門入翁洲相魯王兆人自中書舍人晉儀
 部郎肯堂築雪交亭於翁洲嘗語之曰此卽吾止水也兆人
 對曰豈敢令相公獨死辛卯九月初二日翁洲城陷兆人晨
 起謁肯堂示以絕命詞且曰事至此兆人請先肯堂領之俄
 頃肯堂呼其闔門二十七人以次畢命乃自投纆梁塵甫動
 一卒趨告曰蘇儀曹死廡下矣肯堂曰取卮酒來酒至酌兆
 人尸前而祝之曰君其待我復歸死亭中鄞人聞性道入翁
 洲取亭中骨分男女納兩大甕合瘞之補陀之茶山兆人骨
 亦附焉吳江新志時同死舟山之難有戶部主事江用楫蘇州人
 妻亦自縊兵部主事顧珍長洲人工部主事顧宗堯長洲人

母同死乾隆四十一年皆通諡節愍

殉節錄

趙廕字任卿吳江人士諤從子以武舉為金山營把總被劾革職崇禎九年流寇犯安廬巡撫張國維拔為守備屯太湖縣十年二月賊東下廕提兵禦之至雞飛灘遇賊二百餘騎擊却之追奔抵通湖賊以百騎來山前挑戰廕據山為營遣千總楊國鎮等以銳卒二百赴之射殺賊渠數人而賊潛從山後以千騎襲營廕力拒之手及十餘賊以眾寡不敵被執不屈遂遇害部下李池等皆格鬪死事聞贈指揮同知子孫世襲總旗仍令太湖建祠祀之乾隆四十一年通諡節愍

舊志參殉

節錄

王燾字濬仲崑山人少孤貧九歲為人後族人有謀其產者燾舉以讓之迎養嗣祖母及母惟謹萬厯末舉於鄉由教諭厯隨州知州州經羣盜焚掠戶不滿千燾訓民兵繕守具土寇李良喬為亂殲滅之十年正月大賊奄至燾且守且戰擊斬三百餘人賊攻益力相持二十餘日天大風雪守者多散燾知必敗入署整冠帶自經賊焚其署火獨不及燾死所屍直立不仆賊望見駭走已覓州印得之燾所立尸土下事聞贈太常少卿福王時賜諡烈愍建雙忠祠與同邑蔡懋德並祠

乾隆四十一年通諡節愍

明史參殉節錄

顧繩詒字敬承長洲人其志仲子崇禎庚午舉人是科楊廷樞

為解首得人最盛一日諸同年大會虎邱山酒酣廷樞離席起揚觶大言曰吾兄弟中有能為方正學楊椒山其人者卒此爵眾方目廷樞繩詒應聲起端拱趨出曰小弟能為引爵一飲而盡一坐大驚然以繩詒生平豈弟多智詼諧滑稽未有心許者崇禎末授仁壽知縣張獻忠破蜀據成都以繩詒循吏得民心遣人招之繩詒忼慨指天誓不辱賊即馳馬入學自縊死時甲申七月也乾隆四十一年通諡節愍

明史參徐枋書

顧公事及殉節錄

毛維張字國卿吳縣人由例監生為長子縣丞署邑篆魏忠賢遣其下勾索府縣庫銀維張預備一冊言邑小糧輕徵解無

餘使者信之迄忠賢敗山西諸縣獨長子庫銀無缺崇禎壬午遷和陽衛經歷巡城有功賜宴加級甲申三月為流賊所執酷刑逼金罵賊而死乾隆四十一年奉旨入祠

江南通志

參舊府志及殉節錄

許炎字玉仲長洲人幼有至性嘗割臂療父疾為諸生磊落不羈聞京師陷帝狗社稷大慟誓欲舉義兵討賊走告里薦紳皆不應端午日過友人出酒飲之玉仲擲杯大詬曰今何日我輩讀聖賢書尚縱酒如平日邪拂衣竟去已聚哭明倫堂玉仲衰杖擗踊號泣盡哀御史謁文廟猶吉服玉仲率諸生責以大義御史惶悚謝罪去及南都頒監國詔而哀詔猶未

頌玉仲益憤慟趨古廟自經為人所解乃步至胥門投於河
潞王舟至拯之出詢其故嗟嘆良久識玉仲者掖以歸家人
旦夕守之不得死遂絕粒尋聞哀詔至即庭中稽首號慟并
不復言以六月十三日卒鄉人私謚曰潛忠先生南中贈五
經博士祀旌忠祠乾隆四十一年奉 旨入祠 明史參
殉節錄

徐嶧字瞻洪常熟人家貧少時寄食外家苦心力學為諸生卓

然自立甲申聞變慟哭不食欲死家人每謹伺之乙酉 大

兵至下菴髮令囁澹然如常呼婦共奕婦方屑麥為飯不應

強之終一局歎息而起題詩留几上闔戶自經 按殉節錄云
焚儒衣冠於

文廟赴 乾隆四十一年奉 旨入祠 舊志參
殉節錄

曹遜曹肅曹敬俱諸生興州衛籍長洲人城陷與祖母姜氏母

張氏遜妻李氏肅妻周氏妹持順同日縊死闔門殉節 按明
史傳

有肅弟持敏持敏為
曹遜字肅之兄也 乾隆四十一年奉 旨入祠 殉節
錄

髯樵叟不知姓名吳縣人美髯長身多膂力採薪洞庭山中負

三百斤貨於人祇索百斤直人怪問之曰吾力能負何妨均

直直輕售速即沽酒痛飲放歌歸午後又入山輒至人迹罕

到之處人又怪之答曰吾力多合遠樵近地應讓力少者忽

山中傳京師陷乃椎胷長號投震澤中死乾隆四十一年奉

旨入祠 江南通志
參殉節錄

盧渭 縣志名
涇材 字渭生長洲歲貢生為督師史可法幕客初可法

出鎮淮揚渭等伏闕上書言秦檜在內李綱在外宋終北轅
不納居禮賢館久可法才渭渭方歲貢當得官不受職而擬
授崑山歸昭等二十餘人為通判推官知縣甫二旬而揚州
城陷渭監守鈔關投於河歸昭等死西門從者十七人乾隆
四十一年奉 旨入祠 明史參 殉節錄
歸昭崑山人生員入史可法幕府守揚州西門城破死之乾隆
四十一年奉 旨入祠 殉節錄
文乘字應符長洲人大學士震孟次子諸生南都亡隱山中有
誣其與吳江吳易通者逮至官乘不辨徐曰不辱我父願就
死妻周氏即順昌之女亦殉其旁乾隆四十一年奉 旨

入祠 舊志參 殉節錄

項志寧字靖伯常熟人少孤好學能文屢試棘闈不售福王時
始以選貢入南都一日謁同里巨卿甫就坐聞人報大僚某
某至志寧退入屏後聞其言惟媚事權要為營私植黨計急
歸泣語弟志康曰事不可為矣及薙髮令下遺書知交約同
殉題詩於壁遂不食死門人私諡曰文烈時里中先後殉義
者屈坦之字毓庵文行修潔為鄉祭酒甲申之變不食七日
死鄉飲賓祝舜齡聞變觸階死子汝祥哭斂畢與妻葉氏子
萬壽投井死乾隆四十一年並奉 旨入祠王道煥邑令
王鈇後裔城破遇兵死二子一女號慟絕食俱死 陳如塗撰 傳參縣志

錄 殉節

虎邱儒士不知姓名里貫南京破儒冠藍衫躍虎邱劍池中死

士人憐而葬之乾隆四十一年奉

旨入祠

殉節錄

徐守質字野王常熟人有聲庠序兵至母病不能去謂兄基曰不可俱死斷徐氏世兄長宜行守質當侍母基曰弟賢不可徒死我無益於時當侍母死生以之相讓且久兵勢益急基乃棄妻子逃守質被二創死母與妹俱沈井中乾隆四十一年奉 旨入祠

馮知十字彥淵常熟人復京季子縣學生為人有謀而勇於義知明將亡乃招致四方奇士知星厯善弓馬者座上恒滿福

王時挾策入南都有內臣識而奇之將草疏舉為總兵知十恥由庵寺進固謝止之鄉兵起眾且數萬知十歎曰此輩但拍手將駭而走何能為耶諒為義士不當苟免我居此以俟死耳七月十三日 大兵至邑知十在友人何氏舍猝遇之奮臂格鬪飛矢中胷仆地被斫死乾隆四十一年奉 旨

入祠

以上二人據馮班三義傳參忠烈紀實及殉節錄

顧所受字性之長洲人幼穎異為邑令江盈科所賞年十一補弟子員從管志道講學喜交遊有盛名然性嚴重以禮義自守學者憚之稱為東湖先生甲申之變聞許仲玉死哭曰吾乃不能與君同死愧君多矣為之作傳及南京不守郡縣望

風至解所受歎曰今日人心如此皆緣不學乃作捲堂文辭

文廟五月二十八日赴泮水死

忠節紀實

殷獻臣字汝劼長洲諸生少與周順昌朱陞宣同學友善一時

人望有五奎之目順昌被逮獻臣奔走周旋幾及於難國變

後不食死鄉人私諡孝終先生

徐枋書殷先生私諡議後逸史合纂

沈璜字璧甫長洲人與王德操林若撫先後稱詩長身頰面狀

貌類河朔間人重氣任俠好為人急難畫策嘗遊遼左督師

袁崇煥死致幕下劇論兵事往往屈其坐客崇煥沒後痛其

罪疑辟重酒間歎息聲淚俱下卜居虎邱之西亂後還吳城

兵至倉皇之虞山次近郊白刃及之夫婦皆遇害

舊志

汝可起字君喜吳江人崇禎壬午以貢士廷試入都時疆圉多

故帝臨軒試選人騎射可起三發三中的上善之未及用吏

部循資授常州府訓道南歸至河間之故城縣縣已被兵可

起止寓舍遊騎突入戶見可起危坐不動曰汝官人耶當降

我降即不死可起叱之曰汝知有不畏死官人耶遂被刃罵

不絕口探血書壁未成字而死

松陵文獻

顧維寰字含英長洲諸生聞煤山之變哭臨於明倫堂巡按周

一敬鳴金繡衣而來有張長瀾者與維寰奮前牽其裾曰此

何時尚衣此章服邪一敬慙而易之維寰泣曰在位者舉動

如此時事可知矣歸自經於祖墓側一敬心銜長瀾屬學使

者褫其衿長瀾遂絕意進取策杖遊四方齋志以歿

江南通志

許王家字君聘蘇州郡學生國變後隱居搖城有吏趣之出封利劍一示以期曰不出則死王家曰死分也吾固甘之或勸王家謂君故明一諸生未食天祿胡遽以身殉王家曰君臣之義豈論仕不仕耶吾讀孔子書殺身成位求生害仁已講之熟公等勿復言以父母屬妻顧曰爾善事堂上吾不能終養矣父母知志不可奪含涕謂曰汝行汝志勿念我二人王家肅衣冠再拜赴湖水死年三十有九

劉古江吳縣庠生布政使玉受之子避兵至崑依外父葛太常錫璠以居七月十六日古江以全帛自繫及其妻與兒女腕

投通惠河以死

吳門補乘

周鏡吳人奎長子烈后弟官都督崇禎末殉難夫婦同縊

吳門補乘

吳鑑字子儀易族子也為諸生有名乙酉六月七日大兵徇

吳江知縣林崑走歸閩縣丞朱國佐以迎降改知縣黃蜚兵至無錫鑑大喜徒手入縣庭罵國佐執送蘇州知府不能屈訊其黨與則曰孔子孟子張睢陽顏平原皆是也未幾

殺於胥門及易起兵擒國佐授其父汝延殺以祭鑑

忠烈紀實參縣

志時邑人先後死義者潘爾彪字京慧丙子舉人常在吳易

孫兆奎軍中後以病不能從及聞變憤懣以手拍案而絕吳振遠字日干易舉兵時振遠亦部署里中子弟為一軍易敗

後軍亦散丙戌春易復起 大兵蹤迹之事連振遠縛至蘇

州不屈死徐鑛字掌文與易同起兵易被執鑛走武康山中

死周耀始字思橋為諸生與易倡議城守易敗護老弱出城

未幾不食死沈璐字伯玉太常漢曾孫與耀始同守東城

大兵至死之又有呂雲孚沈約不能詳

吳江新志

陳宗道字夷甫吳江人授徒西洞庭山間北京變入淮以策干

當事不用遂歸漕撫路振飛流寓洞庭宗道讓之曰此非公

等偷閒時也尋以不薙髮見殺同時以違制死者太學生丁

士俊字顓卿顧觀光字賓容醫者張起生

忠烈紀實參吳江新志

周邦彥字念祖瑞安令大章元孫邑諸生以世職千戶讓其弟

邦穆明亡誓以身殉丙戌冬賦絕命詞一夕走投吳淞江死

邦穆字子遠承世職以火失部劄降授試百戶六輓漕有廉

幹聲甲申後堅卧不起丙戌夏漕官馳檄強起之遂不食六

日先其兄邦彥死

吳江新志

趙牧常熟人與福建人林籥舞皆為平海將軍周崔芝客籥舞

為參謀牧為總兵鄭芝龍之降也籥舞陳八不可弗聽監軍

朱永佑謂崔芝曰虞山趙牧其人勇士也我欲使見芝龍而

刺之不果丁亥正月崔芝復海口籥舞與牧守之四月 大

兵攻海口牧出戰所殺傷過當又益兵攻之城破兩人皆死

忠烈紀實

王奕昌字德符常熟人參議嘉言曾孫以貢除江西布政司理
 問遷廣西都司斷事署武宣陽朔二縣所至治辦靖江王亨
 嘉久蓄異志奕昌刺得其狀密告巡撫瞿式耜早為之備乙
 酉七月唐王建號亨嘉拒命襲破梧州禽式耜以歸囚之邸
 中奕昌遣間使饋鮭菜得式耜密書星夜趣東將吏進兵亨
 嘉就縛亂遂定丁亥永明王從桂林走楚式耜留守桂林奕
 昌以府同知守柳 大兵逼桂林分兵從潯州略左右郡縣
 趨柳叛將李明忠據潯以瞰柳分守副使知府推官皆遁奕
 昌獨與馬平令城守明忠劫降書至奕昌縛其使械送桂林
 誓死待援會武宣狼目廖文登等襲沉北舟思恩侯陳邦傳

復潯州明忠遁柳乃固是年夏式耜奏擢奕昌為按察僉事
 監陽朔軍與新興侯焦璉恢復平樂戊子二月陞廣西右參
 議督理糧儲明年六月一日輓運至龍門為滇營亂卒所害

贈太僕卿

舊志

葉樹人字古為吳江人好讀書為舉子業試不利旋棄去為古
 文辭有春暉堂詩文集歲乙酉 大兵南下被執不屈死乾
 隆間蒐訪前明殉國諸人守土者未之及故未蒙旌卹

唐仲冕撰

傳

王上壽字調之吳江盛澤人諸生慷慨尚氣節初與吳昌時楊
 維斗共入匡社既而匡社亦合於復社上壽艷然曰講學而

動輒千人禍將及矣歸而自結淳社於里中一時同筆硯者皆錚錚奇士順治乙酉大兵至盛澤鎮上壽閉戶不出巾服如故竟與族子臣良族孫湜同死臣良字爾諫湜字其泚皆邑諸生有文譽

江震續志稿

沈龍含字晉叔吳江人商城知縣孚聞孫仁和諸生崇禎乙酉

與弟致景致昂同殉節死致昂婦周氏從夫殉節

沈氏譜

徐允芳西洞庭人由武舉薦為守備討賊屢立殊功授虎宣將

軍賜名人龍後從督帥史可法鎮守淮投於陣

吳縣志

周廷柱字道生吳江人諸生御史宗建姪有才略尚氣義崇禎

甲申夏福王立詔求人才謁閣部史可法陳戰守策授淮海

都司乙酉四月南都亡隨可法殉難揚州年四十五

江震續志稿

本朝

○尹明廷字莫階吳縣人順治己丑進士選授廣西平樂知縣

李定國之亂明廷被執說之降大罵曰狂賊死吾分也何多

言定國怒去其衣束以漁網繫磔之至死罵不絕口時順治

十年七月十九日也百姓瘞其骨於府治牌坊之側滇黔平

嗣子宗文至平樂求父尸有老媪告其處啟得之負以歸事

聞贈太僕寺卿賜祭葬宗文以蔭官柘城知縣初明廷之

從兄明徵為邑諸生當鼎革時攜其妻抱幼女赴井死宗文

卽其所生也

舊志

○楊士祥字愛林崑山人幼從軍積資至千戶康熙甲寅耿精忠反於閩將軍楊捷督師赴浙以士祥爲隨營守備尋進中軍兼管糧餉時頓兵仙霞嶺下賊騎衝突兵皆潰士祥恐餉失乃瘞銀而識其處從者挽之去不從大呼擊賊遂被害精忠敗降得所瘞餉銀事 聞贈清遠將軍 賜祭葬蔭一

子千戶

崑新續志稿

○程廕桂字燕山號臨川元和人以仁和籍登乾隆二十四年鄉榜除四川大竹知縣三十八年將軍溫福進勦金川召詣幕府六月初四日廕桂解餉至美諾遇金匪大至奮身格鬪死長子烈隨待行間亦抗賊不屈死廕桂性廉介不名一錢

當軍興文移絡繹不以絲粟累民身後囊橐如洗

上聞贈兵備道入昭忠祠蔭其次子煥入監讀書越六年擢用

知縣

吳門補乘

○王翼孫字以燕長洲人世習儒業翼孫少從昭信伯李奉堯遊善騎射能開五石弓乘騎能日行二三百里由宗人府供事叙勞授湖北呂堰驛巡檢乾隆六十年白蓮教匪作亂湖北枝江賊起當陽遠安應之鄖陽宜昌施南荊州諸州縣所在嘯聚其起於黃龍匪者勢張甚逼近呂堰地當驛道之衝翼孫聞亂募鄉勇潛設戒備而賊已大至翼孫率衆迎擊殲其先鋒三人遂登大橋以禦賊賊來益衆鄉兵各潰散去翼

孫手及數賊賊不敢近用矛環刺受重傷跳而投於水賊憤
鈎得翼孫猶瞑目怒罵不已因攢刃殺之毀其尸於橋下比
賊退吏人廖之義往求其尸不獲見橋下沙中有衣迹之乃
翼孫迎擊時所衣者因取歸事 聞部視縣丞例議卹入祀

昭忠祠

賜祭葬予雲騎尉世職初翼孫署長樂縣丞會

湖南永綏苗民亂縣令團鄉勇不給口食吏且爲奸民憤怒
翼孫條列數事上之不行及翼孫去長樂民果變及至呂堰
鎮預立禦賊章程一鄉勇士名設頭目一名頭目十人設總
頭目一人各相鈐制統於巡檢司一附近村落單丁獨戶皆
遷於鎮選壯者充鄉勇以備遣用一設哨探一定功過一儲

軍食一禁遷移鄉勇之外居民各安耕種毋聽傳聞輕去失
業一鄉勇團聚各習技藝不得飲酒賭博蓋其區處經畫如

此

王昶撰
墓志

○費增運字欽伯吳江人父廷珍山東青州知府增運少英敏
果決練習吏事爲福建臺灣彰化典史邑素產米乾隆六十
年春因漳泉二郡大饑裝運過多米價騰貴邑人乘機謀亂
增運偵知之間於令往捕親歷各鄉加意撫慰旣安堵矣未
匝月而逆賊陳周全復倡亂攻陷鹿仔港同知朱紹昌游擊
曾紹龍被害時臺灣北路協副將張無咎遊擊陳大恩猝聞
兵變以縣城插竹爲垣無險可據乃勒兵駐城東之八卦山

縣令朱瀾亦隨往或勸增運守吏既去不若權之他處以圖後効增運毅然曰若我去則城誰與守因巡視城中慰諭百姓悉力固守賊聞城中有備不敢攻徑破八卦山營盤遂乘勢回攻縣城增運知事不可為先令眷屬避民家妻子相向慟哭增運曰此大義也勿擾吾方寸遂揮之去賊至被擒以刃脅令跪地增運厲聲曰死則死耳天下豈有降逆賊之命官乎賊怒擊其脛脛折罵不絕口遂遇害時三月十四日也

事 聞贈武德騎尉 賜祭葬入祀昭忠祠予雲騎尉世

職 金學詩撰墓誌

○江瑤字凌滄休寧籍元和人官湖南乾州巡檢乾隆六十年


正月苗變瑤與妻沈氏妾某氏子朝棟同遇害媳陳氏為賊所得不屈自刎死事 聞議卹同時有施錦亦元和人官貴州銅仁府平頭司吏目亦死苗難於太平場並崇祀昭忠祠予雲騎尉世職瑤從兄琅字亞卿乾隆辛卯進士由庶吉士改兵部主事遷郎中出知福建福寧府居官廉潔丁母憂貧不能歸卒於閩 家述

○錢邦彥常熟人任廣東崖州營參將捕盜歿於海事 聞贈

一品振威將軍崇祀昭忠祠子鐘龔雲騎尉 縣志

○陸霖昭文人四川候補知縣嘉慶元年調至達州軍營赴東

鄉禦賊陣亡事 聞予雲騎尉世職 原案事跡



蘇州府志

卷九十一

蘇州府志卷第九十終

